

四庫全書

史部

欽定四庫全書

史部

通志卷一百三十八

詳校官編修_臣李潢

編修_臣裴謙覆勘

覆校官助教_臣金學詩

校對官學正_臣徐立綱

謄錄監生_臣蔣繼熊

欽定四庫全書

通志卷一百三十八

宋右迪功郎鄭樵漁仲撰

列傳第五十一

齊

劉俊

弟繪

崔祖思

叔父景真

景真子元

荀伯

王

蘇侃

虞棕

胡諧之

范百

虞玩之

劉休

江祐

弟惠休

蕭惠基

惠朗

張岱

兄子

江謐

謝超

宗謝朓謝顥弟到撫沈憲沈冲張融

融弟 王秀之 綸之 阮韜 延之子 王瞻
寶稱 綸之子 昕 秀之子 峻

從叔元載
元載
袁象宗人
劉祥
陸澄
王謏

從叔 何 劉璣 蔡仲熊 婁幼
憲 孔邊 瑜 璣 弟 璣 陸慧曉 兄
閑子 閑子

絳弟孔稚珪父靈產周顥庾杲之江敷

何戢從叔昌寓蔡約 裴昭明 顧憲之 孔琇之

王浚之

劉悛字士操彭城安上里人也彭城劉同出楚元王分

劉悛字士操彭城安上里人也彭城劉同出楚元王分

為三里以別宋氏帝族悛父勔宋鎮軍將軍自有傳悛
少隨父征竟陵王於廣陵以功拜駙馬都尉後為桂陽
王征北中兵參軍與武帝同直殿內深相款好並為宋
明帝所親待悛本名忱宋明帝多忌反語劉忱為臨讐
改名悛焉武帝常至悛宅晝臥覺悛自捧金澡罐受四
升水以沃盥因以與帝前後所納稱此後遷安遠護軍
武陵內史郡南古江隄久廢悛修未畢而江水忽至百
姓棄役奔走悛親率厲之於是乃立漢壽人邵榮興六

世同爨悛表其門閭悛彊濟有世調善於流俗蠻王田
僮在山中年垂百餘歲南譙王義宣為荊州僮出謁至
是又謁悛明帝崩表求奔赴勅帶郡還都吏民送者數
千萬人悛人人執手繼以涕泣百姓感之贈送甚厚桂
陽之難加寧朔將軍助守石頭父勔於大航戰死悛時
遇疾扶伏路次號哭求勔屍勔屍頂後傷缺悛割髮補
之持喪墓側冬月不衣絮高帝代勔為領軍素與勔善
以書譬悛殷勤抑勉建平王景素反高帝總衆軍出頓

元武湖浚初免喪高帝召浚及其弟愐入省欲使領支
軍及見皆羸削改貌於是而止霸業初建浚先致誠節
沈攸之事起加輔國將軍後為廣州刺史襲爵鄱陽縣
侯武帝自尋陽還遇浚於舟渚懽宴叙舊停十餘日乃
下遣文惠太子及竟陵王子良攝衣履修父友之敬齊
受禪國除平西記室參軍夏侯恭叔上書以柳元景中
興功臣劉劭殞身王事宜存封爵詔以興運隆替不容
復厝意也初蒼梧廢高帝集議中華門見浚謂曰君昨

直邪悛曰僕昨正直而言急在外至是上謂悛曰功名之際人所不忘卿昔於中華門答我何其欲謝世事悛曰臣世受宋恩門荷齊眷非常之勲非臣所及進不遠怨前代退不孤負聖明敢不以實迎答遷太子中庶子領越騎校尉時武帝在東宮每幸悛坊閑言至夕賜屏風帷帳武帝即位改領軍將軍後拜司州刺史悛父勔討殷琰平壽陽無所犯害百姓德之為立碑記悛步道從壽陽之鎮過勔碑下再拜泣涕悛於州治下立學校

得古禮器銅罍甑幽山銅罍罇銅豆鐘各二口獻之遷
長兼侍中車駕數幸悛宅宅盛修山池造甕牖武帝著
鹿皮冠披悛菟皮衾於牖中宴樂以冠賜悛至夜乃去
後從駕登蔣山帝數歎曰貧賤之交不可忘糟糠之妻
不下堂顧謂悛曰此况卿也世言富貴好改其素情吾
雖有四海今日與卿盡布衣之適悛起拜謝累遷始興
王前軍長史平蠻校尉蜀郡太守行益州府州事初高
帝輔政有意欲鑄錢以禪讓之際未及施行建元四年

奉朝請孔顗上鑄錢均貨議辭證甚博其畧以為食貨相通理勢自然李悝曰糴甚貴傷人甚賤傷農人傷則離散農傷則國貧甚賤與甚貴其傷一也三吳國之關與比歲時被水潦而糴不貴是天下錢少非穀穰賤此不可不察也鑄錢之弊在輕重屢變重錢患難用而難用為累輕錢弊盜鑄而盜鑄為禍深人所盜鑄嚴法不禁者由上鑄錢惜銅愛工也惜銅愛工謂錢無用之器以通交易務欲令輕而數多使省工而易成不詳慮

其為患也自漢鑄五銖錢至宋文帝歷五百餘年制度
世有廢興而不變五銖錢者明其輕重可法得貨之宜
以為開置泉府方牧貢金大興鎔鑄錢重五銖一依漢
法若官鑄已布於人使嚴斷剪鑿輕小破缺無周郭者
悉不得行官錢細小者稱合銖兩銷以為大利貧良之
人塞姦巧之路錢貨既均遠近若一百姓樂業市道無
爭衣食滋殖矣時議者多以錢貨輕轉少宜更廣鑄重
其銖兩以防人姦高帝使諸州郡大市銅炭會晏駕事

寢永明八年俊啓武帝曰南廣郡界蒙山下有城名蒙城可二頃地有燒鑪四所高一丈廣一丈五尺從蒙城渡水南百許步平地掘土深二尺得銅又有古掘銅坑深二丈并居宅處猶存鄧通南安人漢文帝賜通嚴道縣銅山鑄錢今蒙山近在青衣水南青衣左側並是故秦之嚴道地青衣縣文帝改名漢嘉且蒙山去南安二百里案此必是通所鑄處近喚蒙山獠出云甚可經畧此議若立潤利無極并獻蒙山銅一片又銅石一片平

州鑄鐵刀一口上從之遣使入蜀鑄錢得千餘萬工費
多乃止悛仍代始興王鑑為益州刺史監益寧二州諸
軍事悛既籍舊恩尤能文附人主承迎權貴賓客閨房
供費奢廣罷廣司二州傾資貢獻家無留儲在蜀作金
浴盆餘金物稱是罷任以奉號還都欲獻之而武帝晏
駕鬱林新立悛奉獻減少鬱林知之諷有司收悛付廷
尉將加誅戮明帝啓救之見原禁錮終身雖見廢黜而
賓客日至海陵即位以白衣除兼左戶尚書尋除正明

帝立加領驍騎將軍復故官駙馬都尉悛歷朝皆見恩
遇高帝為鄱陽王鏘納悛妹為妃明帝又為晉安王寶
義納悛女為妃自此連姻帝室王敬則反悛出守琅邪
城轉五兵尚書初宋桂陽王休範舉兵犯闕悛父勔領
兵鎮扞石頭兵敗死之悛兄弟以父死朱雀航終身不
行此路明帝崩東昏即位改授散騎常侍領驍騎將軍
尚書如故衛送山陵路經朱雀航感慚至曲阿而卒贈
太常常侍都尉如故謚曰敬子三子孺覽遵俱知名悛

弟愐位太子中庶子子苞與孺覽遵皆列在梁史愐弟
繪字士章解褐著作佐郎為高帝行參軍帝見而歎之
曰劉公為不亡也及豫章王嶷鎮江陵以繪為鎮西外
兵參軍繪聰警有文義善隸書數被賞召進對華敏僚
吏之中見遇莫及時琅邪王綱為功曹以吏能自進嶷
謂僚佐曰吾雖不能得應嗣陳蕃然閣下自有二驥也
性通悟出為南康相郡人有姓賴者所居名穢里刺謁
繪繪戲嘲之曰君有何穢而居穢里此人應聲曰未審

孔丘何闕而居闕里繪嘿然不答亦無忤意歎其辯速
繪在郡專意講說上左右陳洪請假南還問繪在郡何
似既而聞之曰南康是三州喉舌應須治幹豈可以年
少講學處之邪召為中書郎掌詔誥勅助國子祭酒何
允撰修禮儀永明末都下人士盛為文章談議皆湊竟
陵王西邸繪為後進領袖機悟多能時張融以言辭辯
捷周顒彌為清綺而繪音采不贍麗雅有風則時人為
之語曰三人共宅夾清漳張南周北劉中央言其處二

人間也魚復侯子響誅後豫章王嶷欲求葬之召繪為
表言其事繪求紙筆須臾便成嶷歎曰禰衡何以過此
唯足八字云提攜鞠養甫見成人後魏使至繪以辭辯
被勅接使事畢當撰語辭繪謂人曰無論潤色未易但
得我語亦難矣事兄悛恭謹與語呼為使君隆昌中悛
坐事將見誅繪伏闕請代兄死明帝輔政救解之乃免
死引為錄事筆翰明帝即位為太子中庶子安陸王寶
暉為湘州以繪為冠軍長史長沙內史行湘州事寶暉

妃悛女也寶暉愛其侍婢繒奪取具以啓聞寶暉以為恨與繒不協遭母喪去官有至性服闋為晉安王征北長史南東海太守行南徐州事及梁武起兵以繒為雍州刺史固讓不就衆以朝廷昏亂為之寒心繒終不受乃改用張欣泰轉繒建安王車騎長史行府國事及東昏見殺城內遣繒及國子博士范雲等齎其首詣梁武帝於石頭轉大司馬從事中郎卒子孝綽梁史有傳繒弟瑱字士溫少有行業文藻篆隸丹青並為當世所稱

時有滎陽毛惠遠善畫馬瑱善畫婦人並為當世第一
瑱妹為鄱陽王妃伉儷甚篤王為明帝所誅妃追傷遂
成痼疾醫所不療有陳郡殷蒨善寫人面與真不別瑱
令蒨畫王形像并圖王平生所寵姬共照鏡狀如欲偶
寢瑱乃密使媼嫺示妃妃視畫竟仍唾之因罵云故宜
其早死於是恩情即歇病亦除差此姬亦被廢苦因即
以此畫焚之瑱仕歷尚書吏部郎義興太守先繪卒

崔祖思字敬元清河東武城人魏中尉琰七世孫也祖

譚宋冀州刺史父僧護州秀才祖思少有志氣好讀書
史年一十八為都昌令隨青州刺史垣護之入堯廟廟
有蘇侯神偶坐護之曰唐堯聖人而與蘇侯神為列今
欲正之何如祖思曰蘇峻今日便為四凶之五使君若
清此坐則是堯廟重去四凶也由是諸雜神並除高帝
在淮陰祖思聞風自結為上輔國主簿甚見親待參預
謀議宋朝初議封高帝為梁公祖思啓曰讖云金刀利
刃齊刈之今宜稱齊實應天命高帝從之自相國從事

中郎遜齊內史高帝既為齊王置酒為樂羹膾既至祖思曰此味故為南北所推侍中沈文季曰羹膾吳食非祖思所解祖思曰魚鼈膾似非勾吳之詩文季曰千里蓴羹豈關魯衛帝甚悅曰蓴羹故應還沈高帝輔政衆議將加九錫內外皆贊成之祖思獨曰公以仁恕匡社稷執股肱之義君子愛人以德不宜如此帝聞之曰祖思還同荀令豈孤所望也由此不復處任職之官而禮見甚重垣崇祖受密旨叅訪朝臣光祿大夫垣闕曰

身受宋氏厚恩復蒙明公接眷進不敢同退不敢異祖思又曰公退讓誠節故宜受之以禮次問冠軍將軍崔文仲文仲問崇祖曰卿意云何對曰聖人云知幾其神又云見幾而作文仲撫髀曰政與吾意同崇祖具說之及帝受禪闕存故爵文仲崇祖皆封侯祖思加官而已除給事中黃門侍郎武帝即位祖思啓陳政事以自古開物成務必以教學為先宜於太廟之南弘修文序司農以北廣開武校又曰漢文集上書囊以為殿帷劉備

取帳構銅鑄錢以充國用魏武遣女皂帳婢十人東阿
婦以繡衣賜死王景興以折米見諫宋武節儉過人張
妃房唯碧綃紋幃三齊苴席五盞盤桃花米飯殷文仲
勸令畜伎答云我不解聲仲文曰但畜自解又答曰畏
解故不畜歷觀帝王未嘗不以約素興侈麗亡也伏惟
陛下體唐成儉踵虞為樸寢殿則素木卑構膳器則陶
瓢充御瓊簪玉笏碎以為塵珍裘繡服焚之如草宜察
朝士有柴車蓬館高以殊等馳禽荒色長違清編如此

則調風變俗不俟終日又曰憲律之重由來尚矣實宜清置廷尉茂簡三官漢來習律有家子孫並傳其業今廷尉律生乃令史門戶刑之不厝抑此之由又曰案前漢編戶千萬太樂伶官才八百二十九人孔光等奏羅不合經法者四百四十一人正樂定員唯置三百八十八人而編戶千萬今戶口不能百萬而大樂雅鄭元徽時校試千有餘人後堂雜伎不在其數糜費既多又傷敗風俗今欲撥邪聲歸正道莫如罷雜伎王庭唯置鐘

簾羽戚登歌而已上詔報答後為青冀二州刺史在政
清簡而謙卑下士言議未嘗及時事上更以敬重之未
幾卒上深加歎息祖思叔父景真位昌平太守有惠政
嘗懸一蒲鞭而未嘗用去任之日人士思之為立祠子
元祖有學行好屬文仕至射聲校尉武帝取為延昌主
帥從駕至何美人墓上為悼亡詩特詔元祖使和稱以
為善永明九年魏使李道固及蔣少游至元祖言少游
臣甥有班倕之工今來必令模寫宮掖未可令反上不

從少游果圖畫而歸元祖歷位驍騎將軍出為東海太守上每思之時節常賜手勅賞賜有加時青州刺史張冲啟淮北頻歲不熟今秋始稔此境鄰接戎寇彌須沃實乞權斷販過淮南而徐兗豫司諸州又各斷穀米不聽出境自是江北荒儉有流亡之弊元祖乃上書謂宜豐儉均之書奏見從祖思宗人文仲立徐州刺史封建陽縣子在政為百姓所懷除黃門侍郎領越騎校尉徙封隨縣嘗獻高帝纏鬚繩一枚上納受之後卒於汝陰

太守贈徐州刺史謚襄子

荀伯玉字弄璋廣陵人也祖永南譙太守父闡之給事中伯玉仕宋為晉安王子勛鎮軍行參軍泰始初隨子勛舉事及事敗還都賣卜自業高帝鎮淮陰伯玉為高帝冠軍刑獄參軍高帝為宋明帝所疑被徵為黃門郎深懷憂慮見平澤有羣鶴仍命筆詠之曰八風儼遙翮九野弄清音一摧雲間翅為君苑中禽以示伯玉深旨伯玉勸高帝命數十騎入魏界安置標榜魏果遣游騎

數百履行界上高帝以聞猶懼不得留令伯玉占伯玉言不成行而帝卒復奉任由是見親待高帝有故吏東莞竺景秀嘗以過繫作部高帝謂伯玉曰卿比看景秀不答曰數往候之備加責誚云若許某自新當吞刀刮腸飲灰洗胃帝善其答即釋之卒為忠信士後隨高帝還都除奉朝請高帝使主家事武帝罷廣興還立別宅遣人於大宅掘樹數株伯玉不與馳以聞高帝善之高帝為南兖州伯玉從轉鎮軍中兵參軍帶廣陵令初高

帝在淮陰伯玉假還廣陵夢上廣陵城南樓上有二青衣小兒語伯玉云草下肅九五相追逐伯玉視城下人頭皆有草泰始七年又夢高帝乘船在廣陵北渚兩腋下有翅不舒伯玉問何時當舒帝曰却後三年伯玉夢中自謂是呪師凡六唾呪之有六龍出兩腋下翅皆舒還復斂元徽二年而高帝破桂陽威名大震五年而廢蒼梧謂伯玉曰卿夢今且效矣昇明初仍為高帝驃騎中兵參軍帶濟陽太守霸業既建伯玉忠勤盡心常衛

左右加前將軍大見委任建元元年封南豐縣子為豫章王司空諮議太守如故時武帝在東宮自以年長與高帝同創大業朝事大小悉皆專斷多違制度左右張景真偏見任遇又多僭侈武帝拜陵還景真白服乘畫舴艋坐胡床觀者咸疑是太子內外祇畏莫敢有言者驍騎將軍陳允叔先已陳景真及太子前後得失伯玉因武帝拜陵之後密啓之上大怒豫章王嶷素有寵政以武帝長嫡又南郡王兄弟並列故武帝為太子至是

有改立之意武帝東還高帝遣文惠太子聞喜公子良
宣勅詰責并示以景真罪狀使以太子令收景真殺之
允叔因白武帝皆言伯玉以聞武帝憂懼稱疾月餘日
上怒不解晝臥太陽殿王敬則直入叩頭啟請往東宮
以慰太子高帝無言敬則因大聲宣旨往東宮命裝束
又勅太官設饌密遣人報武帝令奉迎因呼左右索輿
高帝了無動意敬則索衣以衣高帝仍牽上輿遂幸東
宮召諸王晏飲因游元圃園長沙王晃捉華蓋臨川王

映執雉尾扇聞喜公子良持酒鎗南郡王行酒武帝與
豫章王嶷及敬則自捧肴饌高帝大飲賜武帝以下酒
並大醉盡歡日暮乃去是日敬則則東宮殆廢高帝
重伯玉盡心愈見信任使掌軍國密事權動朝右每暫
休出外軒蓋填門嘗遭母憂成服日左率蕭景先侍中
王晏共載弔之五更便巾車未到伯玉宅二里許王侯
朝士已盈巷至下鼓尚未得前司徒褚淵衛軍王儉俱
進繼後方得前又倚聽事久之中詔遣中書舍人徐希

秀斷哭止客久方得弔比出二人饑之氣息惓然切齒
形於聲貌明日入宮便言云臣等所見二宮門及齋閣
方荀伯玉宅政可設雀羅也續復言外論云千勅萬令
不如荀公一命武帝深怨伯玉高帝臨崩拍伯玉以屬
武帝武帝即位伯玉憂懼上聞之以其與垣崇祖善崇
祖田業在江西慮相扇為亂加意撫之伯玉乃安永明
元年與崇祖並見誣伏誅而允叔為太子左率呂文顯
歎曰伯玉能謀太祖而不能自謀豈非天哉初伯玉微

時有善相墓者謂其父曰君墓當出暴貴者但不得久耳又出失行女子伯玉聞之曰朝聞道夕死可矣頃之伯玉姊當嫁明日應行今夕逃隨人去其家尋求不能得後出家為尼伯玉卒致敗亡云

蘇侃字休烈武邑人也祖護本都太守父端州中從事侃涉獵書傳出身補良城令薛安都反引侃為其府參軍使掌書記侃自拔南歸高帝在淮上便自委結帝用為冠軍錄事參軍是時新失淮北高帝北戍鎮淮陰不

滿千人每歲秋冬間邊淮騷動常恐虜至帝乃作塞客
吟以喻志侃達上之旨更自勤厲遂見委以府事深被
知待桂陽之難帝以侃為平南錄事領軍主從頓新亭
使分金銀賦賜將士帝每遷隨府轉復為帝太尉諮議
侃事帝既久備恙起居乃與邱巨源撰蕭太尉記載帝
征伐之功封新建縣侯齊臺建為黃門侍郎領射聲校
尉任以心膂帝即位撰聖皇瑞命記一卷奏之建元
年卒上惜之甚至謚質侯

虞棕字景豫會稽餘姚人也祖嘯父晉左戶尚書父秀之黃門郎棕少以孝聞父病不欲見人雖子弟亦不得前時棕年十二三晝夜伏戶外問內豎消息問未知轉嗚咽流涕如此者百餘日及亡終喪日唯食麥餅二枚仕宋位黃門郎宋明帝誅山陽王休祐至葬日寒雪厚三尺故人無至者唯棕一人來赴初武帝始從宦家貧薄棕數相分遺每行必呼帝同載帝甚德之建元初為太子中庶子累遷豫章內史棕家富於財而善為滋味

豫章王寔盛饌享賓謂悰曰肴羞有所遺不悰曰何曾
食蔬有黃頤臠恨無之累遷太子右率永明八年大水
百官戎服救太廟悰朱衣乘車鹵簿於宣陽門外入行
馬內馳逐人被奏見原上以悰布衣之舊從容謂悰曰
我當令卿復祖業轉侍中朝廷咸驚其驟遷祠部尚書
武帝幸華林園就悰求味悰獻糲及雜肴數十輿太官
鼎味不及也上就悰求諸飲食方悰祕不出上醉後體
不快悰乃獻醴酒鯖鮓一方而已鬱林王立兼大匠卿

起休安陵於陵所受局下牛酒坐免官隆昌元年以白衣領職鬱林廢悰竊嘆曰王徐遂縛袴廢天子天下豈有此理邪延興元年領右軍明帝立悰稱疾不陪位帝使尚書令王晏齋廢立事示悰以悰舊人引叅佐命悰謂晏曰主上聖明公卿戮力寧假朽老以匡贊惟新乎不敢聞命因慟不自勝朝議欲糾之僕射徐孝嗣曰此亦古之遺直衆議乃止悰稱疾篤還東詔賜假百日轉給事中光祿大夫尋加正員常侍卒悰性敦實與人知

識必相存訪親疎皆有終始世以此稱之

胡諧之豫章南昌人也祖廉之書侍御史父翼之州辟不就諧之仕宋為邵陵王左軍諮議武帝為江州以諧之為別駕委以事任建元二年為給事中驍騎將軍上方欲獎以貴族盛姻以諧之家人語傒音不正乃遣宮內四五人住諧之家教子女語二年後帝問曰卿家人語音正未諧之答曰宮人少臣家人多非唯不能得正音遂使宮人頓成傒語帝大笑徧向朝臣說之永明五

年為左衛將軍加給事中諧之風采瓌潤善自居處兼以舊恩見遇朝士多與交遊六年遷都官尚書上欲遷諧之嘗從容謂曰江州有樂侍中邪答曰近世唯程道惠一人而已上曰當令有二後以語尚書令王儉儉意更異乃以為太子中庶子領左衛率諧之有識具每朝廷官缺乃應選代密量上所用人皆如其言虞棕以此稱服之既居權要多所徵求就梁州刺史范栢年求佳馬栢年患之謂使曰馬非狗子那可得為應無極之求

接使人薄使人致恨歸謂諧之曰栢年云胡諧是何侯
狗無厭之求諧之切齒致忿時王元邈代栢年栢年稱
疾推遷不時還諧之言於帝曰栢年恃其山川險固聚
衆欲擅一州及栢年下帝欲不問諧之又言見虎格得
而放上山於是賜死十年諧之轉度支尚書領衛尉明
年卒謚肅侯栢年本梓潼人土斷屬梁州華陽郡初為
州將劉亮使出都諮事見宋明帝帝言次及廣州貪泉
因問栢年卿州復有此不答曰梁州唯有文川武鄉廉

泉讓水又問卿宅在何處曰臣所居廉讓之間帝嗟其善答因見知歷位內外終於梁州刺史

虞玩之字茂瑤會稽餘姚人也祖宗晉尚書庫部郎父玫通直常侍玩之少閑刀筆汎涉書史仕宋為烏程令路太后外親朱仁彌犯罪玩之依法案之太后怨訴孝武坐免官元徽中為尚書右丞高帝參政與玩之書曰張華為度支尚書事不徒然今漕藏有關吾賢居右丞已覺金粟可積也玩之上表陳府庫錢帛器械役力州

縣轉多興用漸廣慮不支歲月朝議優報之轉少府高
帝鎮東府朝廷致敬玩之為少府猶躡屐造席高帝取
屐親視之訛黑斜銳莫斷以芒接之問曰卿此屐已幾
載玩之曰初釋褐拜征北行佐買之着已三十年貧士
竟不辦易帝咨嗟因賜以新屐玩之不受帝問其故答
曰今日之賜恩華俱重但著簪弊席復不可遺所以不
敢當帝善之引為驃騎諮議參軍霸府初開賓客輻湊
高帝留意簡接玩之與樂安任遐俱以應對席上之美

齊名見遇遷黃門郎領本郡中正先是宋世人籍欺巧及高帝即位勅玩之與驃騎將軍傅堅意檢定簿籍建元二年詔輔臣曰黃籍民之大綱國之政端自頃毗俗欺巧乃至竊注爵位盜易年月增損三狀貿襲萬端或戶存而文書已絕或人在而反託死叛停私而云隸役身彊而稱六疾編戶齊家少不如此皆政之巨蠹教之深疵若約之以刑則人偽已遠若綏之以德則勝殘未易諸賢並深明治體各獻嘉謀以振澆化玩之表言便

宜多見采納於是朝廷乃別置校籍官置令史限人一
日得數巧以防懈怠於是貨賂因緣籍注雖正猶彊推
却以充程限既連年不已又謫巧者戍緣淮各十年百
姓怨望富陽人唐寓之僑居桐廬父祖相傳圖墓為業
寓之自云其家墓有王氣山中得金印轉相誑惑永明
二年冬寓之聚黨遂陷富陽至錢唐僭號置太子賊遂
據郡又遣偽會稽太守孫泓取山陰時會稽太守王敬
則朝正故寓之謂可乘虛而襲泓至浦陽江而郡丞張

思祖遣峽口戍主楊休武拒戰大破之朝廷遣禁兵東討至錢唐一戰便散禽斬寓之進平諸郡縣臺軍乘勝百姓頗被彊奪軍還上聞之收軍主前軍將軍陳天福棄市天福善馬稍為諸將法上寵將也既伏誅内外莫不震肅由是乃詔謫役邊疆各許還本土玩之以久宦年老哀疾上表告退許之玩之於人物好臧否宋末王儉舉貲外郎孔暹使魏玩之言論不相饒儉暹並恨之至是玩之東歸儉不出送朝廷無祖餞者中丞劉休與

親知書曰虞公散髮海隅同古人之美而東都之送殊
不藹藹玩之歸家起大宅數年卒其後貢外郎孔瑄就
儉求會稽五官儉方盥投皂莢於地曰卿鄉俗惡虞玩
之至死煩人

劉休字弘明沛郡相人也父超九真太守休初為駙馬
都尉宋明帝居藩休為湘東國常侍不為帝所知襲祖
爵南鄉侯友人陳郡謝儼同丞相義宣反休坐匿之被
繫尚方孝武崩乃得出泰始初諸州反休素能筮知明

帝當勝靜處不預異謀休之繫尚方也尚方令吳喜愛其才後授吳喜為喜輔師府錄事參軍喜薦之於明帝得在左右版桂陽王征北參軍帝頗有好尚尤嗜飲食休多藝能爰至鼎味無不開解遂見親賞長直殿內後宮孕者帝使筮其男女無不如占帝素肥痿不能御內諸王妓妾懷孕使密獻入宮皆使休筮之以故得親密焉帝憎婦人妬尚書右丞羅彥遠以善碁見親婦妬傷其面帝曰我為卿治之何如彥遠率爾從旨其夕遂賜

藥殺其妻休妻王氏亦妬帝聞之賜休妾勅與王氏二十杖令休於宅後開小店使王氏賣掃帚皂英以此辱之其見親如此尋除貧外郎領輔國司馬中書通事舍人帶南城令後為都水使者南康相休善談政體而在郡無異績建元初為御史中丞頃之啓言宋世載祀六十歷斯任者五十有三校其年月不過盈歲於臣叨濫宜請骸骨上曰卿職當國司以威為本而忽憚世誚卿便應辭之如事可獲何惜晚節邪四年出為豫章內史

卒宋末造指南車高帝以休有思理使與王僧虔對共
監試又元嘉中羊欣重王子敬正隸書世共宗之而右
軍之體微古不復見貴及休始好右軍法因此大行云
江祜字弘業濟陽考城人也祖遵寧朔參軍父德麟司
徒右長史祜姑為高帝兄始安貞王道生妃追謚景皇
后生明帝祜少為明帝所親恩如兄弟明帝為吳興以
祜為郡丞後除通直郎補南徐州別駕明帝輔政委以
腹心引為驃騎諮議參軍領南平昌太守時新立海陵

人情未服祜每說明帝以君臣大節明帝轉顧而不言
明帝驛上有赤誌常祕不傳既而祜勸帝出以示人晉
壽太守王洪範罷任還上袒示之曰人皆謂此是日月
相卿幸無泄之洪範曰公日月在軀如何可隱轉當言
之公卿上大悅會直後張伯尹瓚等屢謀竊發祜憂虞
無計每夕輒託事外出及明帝入纂議定加祜寧朔將
軍明帝為宣城王太史密奏圖緯云一號當得十四年
祜入帝喜以示祜曰得此復何所望及即位遷守衛尉

安陸縣侯祜祖遵以后父贈金紫光祿大夫父德麟以
帝舅亦贈光祿大夫建武二年遷左衛將軍掌甲仗廉
察四年轉太子詹事祜以外戚親要權冠當時魏軍南
伐明帝欲以劉暄為雍州暄時方希內職不願遠役投
於祜祜謂明帝曰昔人相暄得一州便躋今為雍州儻
相中乎上默然俄召梁武帝謂曰今使卿為雍州閫外
一以相委祜既見任遂遠致餉遺或取諸王名書好物
然家行甚睦待子姪有恩永泰元年明帝寢疾轉祜侍

中中書令出入殿省及崩遺詔轉尚書左僕射祔弟衛尉祀為侍中皇后弟劉暄為衛尉與始安王遙光徐孝嗣蕭坦之等輔政誠東昏曰五年中汝勿厝意過此自覽勿復委人及即位祔參掌選事明帝雖顧命羣臣而意寄多在祔兄弟至是更直殿內動止關諮永元元年領太子詹事劉暄選散騎常侍右衛將軍帝稍欲行意徐孝嗣不能奪蕭坦之雖時有異同而祔堅意執制帝深忌之孝嗣謂祔曰主上稍有異同詎可為相乖反祔

曰但以見付必無所憂左右小人會稽茹法珍吳興梅蟲兒東海祝靈勇東治軍人俞靈韻右衛軍人豐勇之等並為帝所委任祆常裁抑之羣小切齒帝失德既彰祆議欲立江夏王寶元劉暄初為寶元郢州行事執事過刻有人獻馬寶元欲看之暄曰馬何用看妃索煮肫帳下詔暄暄曰旦已煮鵝不煩復此寶元恚曰舅殊無渭陽之情暄聞之亦不悅至是不同祆議欲立建安王寶劬密謀於遙光遙光自以年長屬當鼎命微旨動祆

祐弟祀以少主難保勸祐立遙光暄以遙光若立已失元舅之望不肯同故祐遲疑久不決遙光大怒遣左右黃曇慶於青溪橋道中刺殺暄曇慶見暄部伍人多不敢發事覺暄告祐謀帝處分收祐兄弟祀時直在殿內疑有異遣信報祐曰劉暄似有謀今作何計祐曰政當靜以鎮之俄而召祐入見傳中書省先是直齋袁文曠以王敬則勲當封祐執不與帝使文曠取祐以刀環築其心曰復能奪我封不祀祐同日見殺祐任寄雖重而

不忘財利論者以此少之祜等既誅帝恣意游走單騎
奔馳謂左右曰祜常禁吾乘馬小子若在吾豈能得此
因問祜親親餘誰答曰江祥今猶在治乃於馬上作勅
賜祥死祀字景昌位晉安王鎮北長史南東海太守行
府州事祀弟禧早卒有子廡字偉卿年十二聞收至謂
家人曰伯既如此無心獨存赴井死劉暄字士穆彭城
人及聞祜等戮眠中大驚投出戶外問左右收至未良
久意定還坐大悲曰不念江行自痛也遙光事起以討

劉暄為名事平暄遷領軍將軍封平都縣侯其年茹法
珍梅蟲兒徐世標構暄有異志帝曰領軍是我舅豈應
有此世標曰明帝是武帝同堂恩遇如此尚滅害都盡
舅復焉可信乃誅之暄為人性軟弱當軸居政每事讓
江祏羣弟不得進官死之日皆怒之和帝中興元年贈
祏衛將軍暄散騎常侍撫軍將軍並開府儀同三司祀
散騎常侍太常卿

蕭惠基南蘭陵人也父思話宋贈征西將軍儀同三司

自有傳惠基幼以外戚見宋江夏王義恭義恭歎其詳
審以女結婚除車騎主簿泰始初兄益州刺史惠開拒
命明帝遣惠基使蜀宣旨慰勞惠開降而益州土酋反
引氐賊圍州城惠基於外宣示朝廷威賞於是氐人斬
賊帥降還為太子中舍人惠基西使部曲並欲論功惠
基毀除勲簿或問其意惠基曰我若論其此勞則馳驅
而已豈吾懷素之本邪遷黃門郎惠基善隸書及奕碁
高帝與之情好相得早相器遇桂陽王休範妃惠基姊

也帝謂之曰卿家桂陽遂復作賊帝頓新亭壘以惠基為軍副惠基弟惠朗親為休範攻戰惠基在城內了不自疑後為長兼侍中袁粲劉秉起兵之夕高帝以秉是惠基姊夫惠基時直在侍中省遣王敬則觀其指趣見惠基安靜不與秉相知由是益加恩信高帝即位為都官尚書掌吏部永明中為侍中領驍騎將軍尚書令王儉朝宗貴望惠基同在禮閣非公事不私覲焉遷太常加給事中自宋大明以來聲伎所尚多鄭衛淫俗而雅

樂正聲鮮有好者惠基解音律尤好魏三祖曲及相和歌每奏輒賞悅不能已當時能碁人琅邪王抗第一品吳郡褚思莊會稽夏赤松第二品赤松思速善於大行思莊戲遲巧於鬪碁宋文帝世羊元保為會稽帝遣思莊入東與元保戲因制局圖還於帝前覆之高帝使思莊與王抗交賭自食時至日暮一局始畢上倦遣還省至五更方決抗睡於局後寢思莊達旦不寐世或云思莊所以品第致高緣其用思深久人不能對也抗思莊

並至給事中永明中勅使抗品基竟陵王子良使惠基
掌其事初思話先於曲阿起宅有閑曠之致惠基常謂
所親曰須婚嫁畢當歸老舊廬立身退素朝廷稱為善
士明年卒贈金紫光祿大夫子洽附載從兄眎素傳列
在梁史惠基弟惠休永明四年為廣州刺史罷任獻奉
傾資上勅中書舍人茹法亮曰可問蕭惠休故當不復
私邪吾欲分受之也後封建安縣子永元元年從吳興
太守徵為尚書右僕射吳興郡項羽神舊酷烈人云惠

休事神謹故得美遷於時朝士多見殺二年惠休還至平望帝令服藥而卒贈金紫光祿大夫惠休弟惠朗同桂陽賊高帝赦之後為西陽王征虜長史行南充州事坐法免官惠郎弟惠禧位左戶尚書子介亦附祿素傳張岱字景山吳郡吳人也父裕宋會稽太守自有傳岱仕宋州辟從事累遷東遷令時殷冲為吳興太守謂人曰張東遷親貧須養所以栖遲下邑然名器方顯終當大至後為司徒左西曹掾母年八十籍注未滿岱便去

官從實還養有司以岱違制將欲糾舉孝武曰觀過可
以知仁不須案也累遷山陰令職事閑理巴陵王休若
為北徐州未親政事以岱為冠軍諮議參軍領彭城太
守行府州國事後臨海王為征虜將軍鎮廣州豫章王
為車騎將軍鎮揚州晉安王為征虜將軍鎮南兗州岱
歷為三府諮議三王行事與典籤主帥共事事舉而情
得或謂岱曰主王既幼執事多門而每能緝和公私云
何致此岱曰古人言一心可以事百君我為政端平待

物以禮悔吝之事無由而及明闇短長更是才用多少耳入為黃門郎新安王子鸞以盛寵為南徐州割吳郡屬焉高選佐吏孝武召岱謂曰卿美効夙著兼資宦已多今欲用卿為子鸞別駕總刺史之任無謂小屈終當大申也帝崩累遷吏部郎泰始末為吳興太守元徽中為益州刺史加都督數年益土安其政累遷吏部尚書王儉為吏部郎時專斷曹事岱每相違執及儉為宰相以此頗不相善岱兄子瓌與弟恕共誅吳郡太守劉遐

高帝欲以恕為晉陵郡岱曰恕未閑從政美錦不宜濫裁高帝曰恕為人我所悉且又與瓌同勲自應有賞岱曰若以家貧賜祿此所不論若語功推事臣門之恥加散騎常侍建元元年中詔序朝臣欲以右僕射擬岱褚淵謂得此過優若別有忠誠特宜升引者別是一理詔更量出為吳郡太守高帝知岱歷仕清直至郡未幾手勅曰大郡任重乃未欲回換但總戎務殷宜須望實今用卿為護軍加給事岱拜竟中詔以家為府武帝即位

復為吳興太守岱晚節在吳興更以寬恕著名遷南兗
州刺史未拜卒岱初作遺命分張家財封置箱中家業
張減隨復改易如此十數年諡曰貞子岱兄演仕宋位
太子中舍人演子緒字思曼緒少知名清簡寡欲從伯
敷及叔父鏡從叔暢並皆貴異之鏡比之樂廣敷云是
我輩人暢言於孝武帝用為尚書倉部郎都令史諮詳
郡縣米事緒蕭然直視不以經懷宋明帝每見緒輒歎
其清談轉太子中庶子奉州大中正遷司徒左長史吏

部尚書袁粲言於帝曰臣觀張緒有正始遺風宜為宮
職復轉中庶子後為侍中遷吏部郎參掌大選元徽初
東宮官罷選曹擬舍人王儉為格外記室緒以儉人地
兼美宜轉祕書丞從之緒又遷侍中嘗私謂客曰一生
不解作諾有以告袁粲褚淵者由是出為吳郡太守緒
初不知也昇明二年自祠部尚書為高帝太傅長史建
元元年為中書令緒善談元深見敬異僕射王儉嘗云
緒過江來所未有北士可求之耳不知陳仲弓黃叔度

能過之不駕幸莊嚴寺聽僧達道人講維摩經緒坐遠
不聞僧達言上難移緒乃遣僧達以近之時帝欲用緒
為右僕射以問王儉儉曰緒少有清望誠美選也然南
士由來少居此職褚淵曰儉少年或未憶耳江左用陸
玩顧和皆南人也儉曰晉氏衰政不可為則先是緒諸
子皆輕俠中子充少時又不護細行儉又以為言乃止
又立國學以緒為太常外領國子祭酒以王延之代緒
為中書令何點歎曰晉以子敬季琰為此職今以王延

之張緒為之可謂清官後接之者實為未易緒長於周易言精理與見宗一時常云何平叔不解易中七事武帝即位轉吏部尚書祭酒如故永明二年領南郡王師加給事中三年轉太子詹事師給事如故緒每朝見武帝目送之謂王儉曰緒以位尊我我以德貴緒遷散騎常侍金紫光祿大夫師如故給親信二十人復領中正長沙王晃屬選用吳郡聞人邕為州議曹緒以資籍不當執不許晃遺書固請之緒正色謂晃信曰此是身家

州郡殿下何得見逼乃止緒吐納風流聽者皆忘飢疲
見者肅然如在宗廟雖終日與居莫能測焉劉悛之為
益州獻柳數株枝條甚長狀若絲縷時舊宮芳林苑始
成武帝以植於太昌靈和殿前常賞玩咨嗟曰此楊柳
風流可愛似張緒當年時其見賞愛如此王儉為尚書
令丹陽尹時諸令史來問訊有一令史善俯仰進止可
觀儉賞異之問曰經與誰共事答云十餘歲在張令門
下儉目送之時尹丞殷錡在坐曰是康成門人也七年

竟陵王子良領國子祭酒武帝勅王晏曰吾欲令司徒
辭祭酒以授張緒物議以為如何子良竟不拜以緒領
國子祭酒緒口不言利有財輒散之清談端坐或終日
無食門生見緒飢為之辦餐然未嘗求也死之日無宅
以殯遺命凶事不設柳翬止以蘆葭輜車引柩靈上置
盃水香火不設祭從弟融敬緒事之如親兄齋酒於緒
靈前酌飲慟哭曰阿兄風流頓盡追贈散騎常侍特進
光祿大夫謚簡子子完宋後廢帝時為正員郎以險行

見寵坐廢錮完弟兄永明中安西功曹淫通殺人伏法
允兄充知名列在梁史

江謚字令和濟陽考城人祖秉之宋臨海太守自有傳
父徽尚書都官郎吳令元凶弑立殺徐湛之徽以黨與
見誅謚坐繫尚方宋孝武平建鄴乃得出為于湖令彊
濟稱職宋明帝為兗州謚傾身奉事為帝所待及即位
以為驃騎參軍弟蒙貌醜帝嘗召見狎侮之謚再遷右
丞兼比部郎泰始四年江夏王義恭第十五女卒年十

九未筭禮官議從成人服諸王服大功左丞孫曼重奏
禮記女子十五而笄鄭元云應年許嫁者也其未許嫁
者則二十而笄射義云十九猶為殤禮官違越經典於
理無據太常以下結免贖論謚坐杖督五十奪勞百日
謚又奏曼先不研辯混同謬議準以事例亦宜及咎曼
又結免贖論詔可出為建平王景素冠軍長史長沙內
史行湘州事政教苛刻僧遵道人與謚情款隨謚莅郡
犯小事餓繫郡獄遵道裂衣食之盡而死為有司奏徵

還明帝崩遇赦免高帝領南兗州謚為鎮軍長史廣陵
太守入為遊擊將軍性疏俗善趨時利元徽末朝野咸
屬意建平王景素謚深自委結景素敗僅得免禍蒼梧
王廢後物情尚懷疑惑謚獨竭誠歸事高帝昇明元年
為黃門侍郎領尚書左丞沈攸之事起議加高帝黃鉞
謚所建也事寧遷吏部郎建元元年位侍中既而驃騎
豫章王嶷領湘州以謚為長史封永新縣伯三年為左
戶尚書諸王子出閣用文武主帥皆悉以委謚尋勅選

曰江謚寒士誠當不得競等華儕然甚有才幹可遷掌
吏部謚才長刀筆所在幹職高帝崩謚稱疾不入衆頗
疑其怨不預顧命也武帝即位謚又不遷官以此怨望
時武帝不豫謚詣豫章王嶷請問曰至尊非起疾東宮
又非才公今欲何計武帝知之出為鎮北長史南東海
太守未發憂甚乃以弈碁占卦云有客南來金枕玉杯
上使御史中丞沈沖奏謚前後罪惡請收送廷尉詔賜
死果以金罌盛藥鴆之子介建武中為吳令政亦深苛

人門榜死人骸體為謚首介棄官而去

謝超宗陳郡陽夏人也祖靈運宋臨川內史自有傳父鳳與超宗坐靈運事徙嶺南鳳卒徙所超宗元嘉末得還與慧休道人來往好學有文辭盛得名譽新安王子鸞孝武帝寵子超宗以選補王國常侍王母殷淑儀卒超宗作誄奏之帝大嗟賞謂謝莊曰超宗殊有鳳毛恐靈運復出時右衛將軍劉道隆在御坐出候超宗曰聞君有異物可見乎超宗曰懸磬之室復有異物邪道隆

武人無識正觸其父名曰旦侍宴至尊說君有鳳毛超
宗徒跣還內道隆謂檢覓毛至閣待不得乃去泰始中
為尚書殿中郎三年都令史駱宰議策秀孝格五問並
得為上四三為中二為下一不第超宗議不同詔從宰
議高帝為領軍數與超宗共屬文愛其才翰左衛將軍
袁粲聞之謂高帝曰超宗開亮可與語取為長史臨淮
太守粲誅高帝以超宗為義興太守昇明二年坐公事
免詣東府門自通其日風寒慘厲高帝謂四坐曰此客

至使人不衣自暖矣超宗既坐飲酒數杯辭氣橫出高
帝對之甚歡拔為驃騎諮議及齊受禪轉黃門郎有司
奏撰立郊廟歌上勅司徒褚淵侍中謝朓散騎侍郎孔
稚圭太學博士王嘏之總明學士劉融何法圖何曇秀
作者凡十人超宗辭獨見用為人恃才使酒多所陵忽
在直省常醉上召見語及北方事超宗曰虜動來二十
年矣佛出亦無如之何以失儀出為南郡王中軍司馬
人問曰承有朝命定是何府超宗怨望答曰不知是司

馬為是司驢既是驢府政應為司驢為有司奏以怨望
免官禁錮十年後司徒褚淵因送湘州刺史王僧虔閣
道壞墜水僕射王儉嘗為牛驚跣下車超宗撫掌笑曰
落水三公墜車僕射淵出水霑濕狼籍超宗先在僧虔
舫抗聲曰有天道焉天所不容地所不受投畀河伯河
伯不受淵大怒曰寒士不遜超宗曰不能賣秦劉得富
貴焉免寒士前後言諂稍布朝野武帝即位使掌國史
除竟陵王征北諮議領記室愈不得志超宗為子娶張

敬兒女為婦上甚疑之永明元年敬兒誅超宗謂丹陽尹李安人曰往年殺韓信今年殺彭越君欲何計安人具啓之上積懷超宗輕慢使兼中丞袁象奏超宗請付廷尉武帝雖可其奏以象言辭依違使左丞王逡之奏象輕文畧奏撓法容非請免象所居官詔象匿情欺國愛朋罔主免官禁錮十年超宗下廷尉一宿髮白皓首詔徙越雋行至豫章上勅內史虞棕賜自盡勿傷其形骸明年超宗門生王永又告超宗子才卿死罪二十餘

條上疑其妄以才卿付廷尉辯以不實見原永先於獄盡之才卿弟幾卿列在梁史

謝朓字元暉超宗之族父而宋左僕射裕之姪子也祖述吳興太守附載裕傳父綿散騎侍郎朓少好學有美名文章清麗為隨王子隆鎮西功曹轉文學子隆在荊州好辭賦數集僚友元暉尤被賞遇流連晤對不捨日夕長史王秀之以元暉年少相動欲以啓聞武帝嘗勅令還都朓道中為詩寄西府曰常恐鷹隼擊秋菊委嚴

霜寄言尉羅者寥廓已高翔仍除新安王中軍記室朓
為牋辭子隆時荊州信去倚待朓執筆便成文無點易
以本官兼尚書殿中郎隆昌初勅朓接北使朓自以口
訥啓辭見許明帝輔政以為驃騎諮議領記室掌霸府
文筆又掌中書詔誥轉中書郎出為晉安王鎮北諮議
南東海太守行南徐州事啓王敬則反謀上甚賞之遷
尚書吏部郎朓上表三讓中書疑朓官未及讓以問國
子祭酒沈約約曰宋元嘉中范曄讓吏部朱修之讓黃

門蔡興宗讓中書並三表詔答其事宛然近世小官不讓遂成常俗王藍田劉安西並貴重初自不讓今豈可慕此不讓邪孫興公孔顗並讓記室今豈可三署皆讓邪謝吏部今授起階所讓別有意豈闕官之大小撓讓之美本出人情若大官必讓便與詣闕章表不異例既如此謂都非疑朮又啓讓上優答不許朮善草隸長五言詩沈約常云二百年来無此詩也敬皇后遷祔山陵朮撰哀策文齊世莫有及者東昏失德江祏欲立江夏

王寶元末更回惑與弟祀密謂朮曰江夏年少脫不堪
負荷神器不可復行廢立始安年長入纂不垂物望非
以此要富貴政是求安國家爾遙光又遣親人劉渢密
致意於朮欲以為肺腑朮自以受恩明帝非渢所言不
肯答少曰遙光以朮兼知衛尉事朮懼見引即以祐等
謀告左興盛興盛不敢發言又說劉暄曰始安一旦南
面則劉渢劉晏居卿今地但以卿為反覆人爾暄陽驚
馳告始安王及江祐始安欲出朮為東陽郡祐固執不

與先是眇常輕祐為人祐嘗詣眇眇因言有一詩呼左右取既而便停祐問其故云定復不佳祐以為輕已後祐及弟祀劉渢劉晏俱候眇眇謂祐曰可謂帶二江之雙流以嘲弄之祐轉不堪至是構而害之詔暴其過惡收付廷尉又使御史中丞范岫奏收眇下獄死時年三十六臨終謂門賓曰寄語沈公君方為三代史亦不得見沒初眇告王敬則反敬則女為眇妻常懷刀欲報眇眇不敢相見及當拜吏部謙挹尤甚尚書郎范縝嘲之

曰卿人地之美無慙小選但恨今自不可刑于寡妻朧有愧色及臨誅歎曰天道其不可昧乎我雖不殺王公王公因我而死朧好獎人才會稽孔閭粗有文筆未為時知孔稚珪嘗令草讓表以示朧朧嗟吟良久手自折簡寫之謂稚珪曰士子聲名未立應共獎成無惜齒牙餘論其好善如此朧及殷濬素與梁武以文章相得帝以大女永興公主適濬子鈞第二女永世公主適朧子謨及帝為雍州二女並暫隨母向州及梁武即位二主

始隨內還梁武意薄謨又以門單欲更適張弘策子弘
策卒又以與王志子諲而謨不堪歎恨為書狀如詩贈
主主以呈帝甚蒙矜歎而婦終不得還尋用謨為信安
縣稍遷王府諮議時以為沈約早與朏善為制此書云
謝顥字仁悠朏之族子也祖密宋侍中父莊中書令散
騎常侍金紫光祿大夫莊附載密傳顥少簡靜宋末為
豫章太守至石頭遂白服登烽火樓坐免官詣高帝自
占謝言辭清麗容儀端雅左右為之傾目宥而不問永

明初高選文學以顯為竟陵王友歷吏部郎有簡秀之
目卒於北中郎長史顯弟瀹字義潔年七歲王或見而
異之言於宋孝武召見於人衆中瀹舉止閑詳應對合
旨帝悅詔尚公主景和敗事寢僕射褚淵以女妻之厚
為資送性甚敏瞻嘗與劉悛飲推讓久之悛曰謝莊兒
不可云不能飲瀹曰苟得其人自可湛湏千日悛甚慙
無言仕齊累遷中書侍郎衛軍王儉引為長史雅相禮
遇後拜吏部尚書明帝廢鬱林領兵入殿左右驚走報

瀹瀹與客圍碁每下子輒云其當有意竟局乃還齋臥
竟不問外事明帝即位瀹又屬疾不知公事蕭湛以兵
臨起之瀹曰天下事公卿處之足矣且死者命也何足
以此懼人後宴會功臣上酒尚書令王晏等興席瀹獨
不起曰陛下受命應天王晏以為已力獻觴遂不見報
上大笑解之坐罷晏呼瀹共載欲相撫悅瀹又正色曰
君巢窟在何處晏初得班劔瀹謂曰身家太傅裁得六
人若何事頗得二十晏甚憚之謂江祐曰彼上人者難

為訓對加領右軍將軍兄肱在吳興論啓公事稽晚瀟
輒代肱為啓上知非肱手迹被問見原永泰元年卒於
太子詹事贈金紫光祿大夫謚簡子初肱為吳興瀟於
征虜渚送別肱指瀟口曰此中唯宜飲酒瀟建武之朝
專以長酣為事與劉瑱沈昭畧交飲各至數斗武帝問
王儉當今誰能為五言儉曰肱得父膏腴江淹有意上
起禪靈寺勅瀟撰碑文其辭甚佳子覽附載兄肱傳列
在梁史

到撫字茂謙彭城武原人也祖彥之宋護軍將軍自有傳父仲度驃騎從事中郎撫襲爵建昌公宋明帝立欲收物情以撫功臣之後自長兼左戶郎中擢為太子洗馬撫資藉豪富厚自奉養供一身一月千萬宅宇山池妓妾姿藝皆窮上品才調流贍善納交游愛妓陳玉珠明帝遣求不與逼奪之撫頗怨帝令有司誣奏將殺之撫入獄數宿鬚髮皆白免死繫尚方奪封與弟賁撫由是更以賤素自立明帝崩弟賁讓封還撫朝議許之弟

遁元徽中為南海太守在廣州昇明元年沈攸之反刺
史陳顯達起兵應朝廷遁猶豫見殺遁家人在都從野
夜歸見兩三人持堊刷其家門須臾而滅明日而遁死
問至撫懼請高帝謝即拔撫武帝中軍諮議參軍建元
初國除武帝即位累遷司徒左長史宋時武帝與撫同
從宋明帝射雉郊野渴倦撫得早青瓜與上對剖食之
上又數遊撫家懷其舊德至是一歲三遷永明元年為
御史中丞車駕幸丹陽郡宴飲撫恃舊酒後狎侮同列

謂庾杲之曰蠢爾蠻荆其俗鄙復謂虞棕曰斷髮文身其風陋王晏既貴雅步從容又問曰王散騎復何故爾晏先為國常侍轉員外散騎郎此二職清華所不為故以此嘲之王敬則執檠查以刀子削之又曰此非元徽頭何事自契之為左丞庾杲之所糾以贖論再遷左衛將軍隨王子隆帶彭城郡撫問訊不脩部下敬為有司舉免官後為五兵尚書廬陵王中軍長史卒子沆嗣列在梁史

沈憲字彥璋吳興武康人也祖說道巴西梓潼二郡太守父璞之北中郎行參軍憲少有幹局為駕部郎宋明帝與憲園碁謂曰卿廣州刺史材也補烏程令甚著政績太守褚淵歎美以為方圓可施少府管掌煩冗材幹者並更其職憲以吏能累遷少府卿武陵王曄為會稽以憲為左軍司馬高帝以山陰戶衆難御欲分為兩縣武帝啓曰縣豈不可御但用不得人耳乃以憲帶山陰令政績大著孔珪請假東歸謂人曰沈令料事特有天

才後為晉安王後軍長史廣陵太守西陽王子明代為
南兖州憲仍留為冠軍長史太守如故永明八年子明
典籤劉道濟贓私百萬為有司所奏賜死憲坐不糾免
官後除散騎常侍未拜卒當時稱為良吏憲同郡邱仲
起先是為晉平郡清廡自立褚淵歎曰目見可欲心能
不亂此楊公所以遺子孫也仲起字子震位至廷尉卒
沈沖字景綽吳興武康人也父懷文宋廣陵太守為孝
武帝所忌收付廷尉賜死自有傳沖涉獵文義仕宋歷

位撫軍正佐兼記室及父懷文得罪被繫沖與兄淡深
行謝情哀貌苦見者傷之柳元景欲救懷文言於孝武
曰沈懷文三子塗炭不可見願陛下速正其罪帝曰宜
急殺之使其意分竟殺之元景為之歎息沖兄弟以此
知名累遷司徒錄事武帝為江州沖為征虜長史尋陽
太守建元中累遷太子中庶子武帝在東宮待以恩舊
及即位轉御史中丞侍中永明四年為五兵尚書沖與
兄淡深名譽有優劣世號為腰鼓兄弟淡深並歷御史

中丞兄弟三人皆為司直晉宋所未有也中丞案裁之
職被惡者多結怨永明中深彈吳興太守袁象建武中
象從弟昂為中丞到官數日奏彈深子績父在儻白憶
車免官禁錮沖母孔氏在東鄰家失火疑為人所焚爇
大呼曰我三兒皆作御史中丞與人豈有善者方恐肌
分骨散何但焚如兄弟後並歷侍中武帝方欲任沖尋
卒追贈太常謚曰恭子

張融字思光吳郡吳人也父暢宋會稽太守附載其叔

父南蠻校尉邵傳融弱冠有名道士陸修靜以白鷺羽
塵尾扇遺之曰此既異物以奉異人解褐為宋新安王
子鸞行參軍王母殷淑儀薨後四月八日建齋并灌佛
僚佐觀者多至一萬少不減五千融獨注觀百錢帝不
悅曰融殊貧當序以佳祿出為封溪令從叔永出後渚
送之曰似聞朝旨汝尋當還融曰不患不還正恐還而
復去及行路經嶂嶮獠賊執融將殺而食之融神色不
動方作洛生詠賊異之而不害也浮海至交州於海中

遇風終無懼色方詠曰乾魚自可還其本鄉肉脯復何
為者哉又作海賦文辭詭激獨與衆異後以示鎮軍將
軍顧覲之覲之曰卿此賦實超元虛但恨不道鹽耳融
即求筆注曰漉沙構白熬波出素積雪中春飛霜暑路
此四句後所足也覲之與融兄有恩好覲之卒融身負
墳土在南與交趾太守卞展善展於嶺南為人所殺融
挺身奔赴舉後秀才射策中第為尚書殿中郎不就改
為儀曹郎尋請假奔叔父喪道中罰幹錢敬道鞭杖五

十寄繫延陵獄大明五年制二品清官行僮幹杖不得
出十為左丞孫緬所奏免官復位攝祠部倉部二曹時
領軍劉劭戰死融以祠部議上應哭劭帝納之又俗人
忌以正月開太倉融議不宜拘束小忌尋兼掌正厨見
宰殺迴車徑去自表解職再遷南陽王友融父暢為丞
相義宣長史義宣敗暢幾為王元謨所殺時元謨子瞻
為南陽王長史暢啓求去官不許融家貧欲祿乃與從
叔征北將軍永書曰融昔幼學早訓家風雖則不敏率

以成性布衣常帶弱年所安簞食瓢飲不覺自樂但人生多待榛栗棗脩女贄既長束帛禽鳥男禮已大勉身就官十年七仕不欲代耕何至此事昔求三吳一丞雖屬舛錯今聞南康缺守願為得之融不知階級階級亦可不知融政以求丞不得所以求郡求郡不得亦可復求丞又與吏部尚書王僧虔書曰融天地之逸人也進不辯貴退不知賤實以家貧累積孤寡傷心八姪俱孤二弟頓弱豈能以山海陋祿申融情累阮籍愛東平土

風融亦欣晉平閤外時議以融非御人才竟不果用辟
齊太傅掾稍遷中書郎非其所好乞為中散大夫不許
張氏自敷以來並以理音辭脩儀範為事至融風止詭
越坐常危膝行則曳步翹身仰首意制甚多見者驚異
聚觀成市而融了無慙色隨例同行常稽遲不進高帝
素愛融為太尉時與融款接見融常笑曰此人不可無
一不可有二即位後手詔賜融衣曰見卿衣服麤故誠
乃素懷有本然過爾藍縷亦虧朝望今送一通故衣意

謂雖故乃勝新也是吾所著已令裁減稱卿之體并履
一量高帝出太極殿西室融入問訊彌時方登階及就
席上曰何乃遲為對曰自地升天理不得速時魏主至
淮而退帝問羣臣彼何意忽來忽去未有答者融時在
下坐抗聲曰以無道而來見有道而去公卿咸以為捷
融善草書常自美其能帝曰卿書殊有骨力但恨無二
王法答曰非恨臣無二王法亦恨二王無臣法融請假
還鄉詣王儉別儉立地舉袂不前融亦舉手呼儉曰前

儉不得已趨就之融曰使融為不慕勢而令君為趨士
豈不善乎常嘆云不恨我不見古人所恨古人又不見
我融與吏部尚書何戢善往詣戢誤通尚書劉澄下車
入門乃曰非是望澄又曰非是既造席視澄曰都自非
是乃去其為異如此入為長沙王鎮軍參軍竟陵王征
北諮議並領記室司徒從事中郎永明二年總明觀講
勅朝臣集聽融扶入就榻私索酒飲之事畢乃長歎曰
嗚呼仲尼獨何人哉為御史中丞到撫所奏免官尋復

職融容貌短醜精神清徹王敬則見融革帶寬殆將至
解謂曰革帶太急融曰既非少吏急帶何為融以假東
出武帝問融住在何處答曰臣陸處無屋舟居無水後
上問其兄緒緒曰融近東出未有居止權遣小船於岸
上住上大笑後使融接對北使李道固道固顧而言曰
張融是宋彭城長史張暢子不融頓蹙久之曰先君不
幸名達六夷豫章王大曾賓僚融食炙始行畢行炙人
便去融欲求鹽蒜口終不言方搗食指半日每出入朝

廷皆拭目驚觀之八年朝臣賀衆瑞公事融扶入拜起復為有司所奏見原遷司徒兼右長史竟陵張欣時為諸暨令坐罪當死欣時父興世討宋南譙王義宣時官軍欲殺融父暢興世以袍覆暢而坐之得免興世卒融著高履為負土成墳至是融啓竟陵王子良乞代欣時死子良答曰此乃是長史美事恐朝有常典不得如長史所懷遷黃門郎太子中庶子司徒左長史融有孝義忌月三旬不聽樂事嫂甚謹父暢臨終謂諸子曰昔丞

相事難吾以不同將見殺緣司馬竺超民得活爾等必
報其子後超民孫徽冬月遭母喪居貧融弔之悲脫衣
以為賻披牛被而反常以兄事徽豫章王寢竟陵王子
良薨自以身經佐吏哭輒盡慟建武四年病卒遺令建
白旒無旒不設祭令人捉麈尾登屋復魄曰吾平生所
善自當陵雲一笑三千賈棺無製新衾左手執孝經老
子右手執小品法華經妾二人事哀畢各遣還家曰以
吾生平之風調何至使婦人行哭失聲不須暫停閨閤

融元義無師法而神解過人高談鮮能抗拒永明中遇疾為問律自序云吾文章之體多為世人所驚汝可師耳以心不可使耳為心師也夫文豈有常體但以有體為常正當有其體丈夫當刪詩書制禮樂何至因循寄人籬下臨卒又誠其子曰手澤存焉父書不讀況文音情婉在其韻吾意不然別遺爾旨吾文體英變變而屢奇豈吾天挺蓋不墮家聲汝可號哭而看之融文集十卷行於世自名其集為玉海司徒褚淵問其故融云蓋

玉以比德海崇上善耳張氏前有敷演鏡暢後有充融
卷稷融第六弟寶稱建武中出為廬陵太守時名流謝
瀹何點陸慧曉孔稚珪至融弟鐵之舍點造坐便曰今
日可謂盛集二五我兄弟之流阿六張氏保家之子顧
見王思遠曰卿詐作善非實得也二五謂稚珪及融並
第五寶稱永元中為湘州行事蕭穎胄在江陵乘腰輿
詣穎胄舉動自若穎胄問何至之晚答曰本朝危亂四
海橫流既不能為比干之死寶未忍為微子之去是以

至晚穎胄深以為善即用為相府諮議參軍後位御史中丞

王秀之字伯奮琅邪臨沂人祖裕之宋特進左光祿大夫自有傳父瓚之金紫光祿大夫秀之始仕宋為太子舍人父卒為庵舍於墓下持喪服闋復職吏部尚書褚淵見秀之貞潔欲與結婚秀之不肯以此頻轉兩府外兵曹參軍後為晉平太守至郡暮年求還或問其故答曰此郡沃壤珍阜日至人所昧者財財生則禍逐智者

不昧財亦不逐禍吾山資已足豈可久留以妨賢路乃
上表請代時人謂王晉平恐富求歸齊受命為豫章王
寢驃騎長史寢於荊州立學以秀之為儒林祭酒武帝
即位累遷侍中祭酒轉都官尚書初秀之祖裕之有特
操徐羨之傳亮當朝裕之不與往來及致仕隱吳興與
秀之父瓚之書深勗以靜退瓚之歷官至五兵尚書未
嘗詣一朝貴江湛謂何偃曰王瓚之今便是朝隱及柳
元景顏師伯貴要瓚之終不詣之至秀之為尚書又不

與王儉款接三世不事權貴時人稱之轉侍中領射聲校尉出為隨王鎮西長史南郡內史後為輔國將軍吳興太守秀之先為諸王長史行事便歎曰仲祖之識已見於今可以止足便無復仕進志止營理舍亭山宅有終焉之志及除吳興郡隱業所在心願為之到郡修舊山移置輜重隆昌元年卒遺令朱服不得入棺祭則酒脯而已世人以僕妾直靈助哭當由喪主不能淳至以多聲相亂魂而有靈吾當笑之謚曰簡子秀之後父弟

延之字希季父昇之位都官尚書延之少而靜默不交
人事舉秀才累遷司徒左長史延之清貧居宇穿漏褚
淵往候之具啓宋明帝即勅材官為起三間齋屋出為
吳郡太守罷還家產無所增益遷吏部尚書尚書左僕
射宋德既衰高帝輔政朝野之情人懷彼此延之與尚
書令王僧虔中立無所去就時人為之語曰二王持平
不送不迎高帝以此善之宋昇明三年出為安南將軍
江州刺史建元元年進號鎮南將軍延之與金紫光祿

大夫阮韜俱宋領軍劉湛外甥並有早譽湛甚愛之曰
韜後當為第一延之為次也延之甚不平每致餉下都
韜與朝士同例高帝聞其如此與延之書曰韜云卿未
嘗有別意當由劉家月旦故邪韜字長明陳留人晉金
紫光祿大夫裕元孫也為南兗州別駕刺史江夏王義
恭逆求資費錢韜曰此朝廷物執不與韜少歷清官宋
孝武選侍中四人並以風貌王或謝莊為一雙韜與何
偃為一雙常充兼假官至散騎常侍金紫光祿大夫領

始興王師卒延之居身簡素清靜寡慾凡所經歷務存
不擾在江州祿俸外一無所納獨處齋內未嘗出戶吏
人罕得見焉雖子弟亦不得妄前時時見親舊未嘗及
世事從容談詠而已後為尚書左僕射尋領竟陵王師
卒謚曰簡子綸之字元章為安成王記室參軍嘗預召
會退居僚末司徒袁粲聞而歎曰格外之官便今日為
重貴遊居此位者遂以不掌文記為高自綸之始也永
明中歷位侍中出為豫章太守下車祭徐孺子許子將

墓圖畫陳蕃華歆謝鯤像於郡朝堂為政寬簡稱良二千石武帝幸琅邪城綸之與光祿大夫金景文等二十一人坐不參承為有司奏免官後位侍中都官尚書卒自裕之至綸之並方嚴皆尅日乃見子孫蓋家風也綸之子昕有業行居父憂過禮謝薨欲遣參之孔稚珪曰何假參此豈有全理竟以憂卒秀之子峻字茂遠少美風姿善容止位桂陽內史梁天監初為中書侍郎梁武帝甚悅其風采與陳郡謝覽同見賞識累遷侍中吏部

尚書處選甚得名譽峻性詳雅無趨競心嘗與謝覽約
官至侍中不復謀仕進覽自吏部尚書出為吳興太守
平心不畏彊禦亦由處俗情薄故也峻為侍中已後雖
不退身亦淡然自守無所營務遷金紫光祿大夫未拜
卒謚曰惠子子琮為國子生尚始興王女繁昌主琮不
慧為學生所嗤遂離婚峻謝王王曰此自上意儂極不
願如此峻曰下官曾祖是謝仁祖外孫亦不藉殿下姻
媾為門戶耳

王瞻字明遠一字叔鸞太原祁人也父元謨宋護軍將軍豫州刺史自有傳瞻負氣傲俗好貶裁人物仕宋為王府參軍嘗詣劉秉直登榻曰君侯是公孫僕是公子引滿促膝唯餘二人秉外跡雖酬之意甚不悅豫章王嶷少時早與瞻友瞻嘗候嶷高論武帝在大牀寢瞻謂嶷曰帳中人物亦復隨人寢興嶷言次忽問王或兄楷賢愚何如殷道矜瞻曰卿遂復言他人兄邪武帝稱嶷小名曰多汝兄愚那得忽來問王參軍此句瞻曰直恐

如卿來談武帝銜之未嘗形之於色後歷黃門侍郎及
建元初瞻為永嘉太守詣闕跪拜不如儀武帝知之召
入東宮仍送付廷尉殺之命左右啓高帝曰父辱子死
王瞻傲朝廷臣輒已收之高帝曰此何足計及聞瞻已
死乃默然無言瞻從叔元載字彥休父蕤東莞太守元
載仕宋位益州刺史沈攸之之難元載起義送誠於高
帝封鄂縣子建元元年為左戶尚書永明四年位兗州
刺史卒官謚烈子元載弟元邈字彥遠仕宋位青州刺

史高帝之鎮淮陰為宋明帝所疑欲北親魏遣書結元
邈元邈長史房叔安進曰布衣常帶之士銜一餐而不
忘義使之然也今將軍居方州之重託君臣之義無故
舉忠孝而棄之三齊之士寧蹈東海死耳不敢隨將軍
也元邈意乃定仍使叔安使建鄴發高帝謀高帝於路
執之并求元邈表叔安答曰寡君使表上天子不上將
軍且僕之所言利國家而不利將軍無所應問荀伯玉
勸殺之高帝曰物各為主無所責也元邈罷州還高帝

塗中要之元邈嚴軍直過還都啓宋明帝稱高帝有異謀高帝不恨也昇明中高帝引為驃騎司馬泰山太守元邈甚懼高帝待之如初再遷西戎校尉梁南秦二州刺史封河陽縣侯兄弟同時為方伯建元初亡命李烏奴作亂梁部元邈使人偽降烏奴告之曰王使君兵弱攜愛妾二人已去矣烏奴喜輕兵襲州城元邈出奇兵破之高帝聞之曰元邈果不負吾延興元年為中護軍明帝使元邈往江州殺晉安王子懋元邈苦辭不行及

遣王廣之往廣陵取安陵王子敬元邈不得已奉旨建武中卒於護軍贈雍州刺史謚壯侯叔安字子仁清河人高帝即位懷其中正時為益州司馬寧蜀太守就拜前將軍方用為梁州會病卒帝歎曰叔安節義古人中求之耳恨不至方伯而終子長瑜亦有義行永明中為州中從事

袁象字緯才陳郡陽夏人宋贈侍中湛之從曾孫也湛自有傳祖洵吳郡太守父覲好學美才早有清譽位武

陵內史彖少有風氣善屬文及談元舉秀才歷王府參軍不就覬臨終與兄雍州刺史顗書曰史公才識可喜足懋先基矣史公彖小字也及顗在雍州舉兵事敗為宋明帝所誅投尸於江不許歛葬彖與舊奴一人微服求尸四十餘日乃得密瘞石頭後岡身自負土懷其文集未嘗離身明帝崩後乃改葬顗從叔司徒粲祖舅征西將軍蔡興宗並器之仕宋為高帝太傅相國主簿祕書丞入齊為中書郎兼太子中庶子又以中書郎兼御

史中丞坐彈謝超宗簡奏依違免官後拜廬陵王諮議
時南郡江陵縣人苟蔣之弟胡之婦為曾口寺沙門所
淫夜入苟家蔣之殺沙門為官司所檢蔣之列家門穢
行欲告則恥欲忍則不可實已所殺胡之列又如此兄
弟爭死江陵令宗躬啓州荊州刺史廬江王求博議象
曰夫迅寒急節乃見松筠之操危機迴構方識貞孤之
風竊以蔣之胡之殺人原心非暴辯讞之曰友于讓生
事憐左右義哀行路昔文舉引謗獲漏疏網蔣之心迹

同符古人若陷以深刑實傷為善由是蔣之兄弟免死
累遷太子中庶子出為冠軍將軍監吳興郡事彖性剛
固以微言忤武帝又薄王晏為人晏請交不答武帝在
便殿用金柄刀子翦爪晏在側曰外聞有金刀之言恐
不宜用此物帝窮問所以晏曰袁彖為臣說之上銜怒
良久彖到郡坐逆用祿錢免官付東治彖妹為竟陵王
子良妃子良世子昭胄時年八歲見武帝而形容慘悴
帝問其故昭胄流涕曰臣舅負罪今在尚方臣母悲泣

不食已積日臣所以不寧帝曰特為兒赦之既而帝遊
孫陵望東治曰治中有一好貴囚數日與朝臣幸治履
行庫藏因晏飲賜囚徒酒肉勅見彖與語明日釋之後
為侍中彖充腴異衆每從射雉郊野數推扶乃能徒步
幼而母卒養於伯母王氏事之如親閨門孝義隆昌元
年卒謚靖子彖宗人廓之字思度宏之曾孫也父景雋
宋世為淮南太守以非罪見誅廓之終身不聽音樂布
衣蔬食足不出門示不臣於宋時又以比晉之王裒顏

延之見其幼時歎曰有子如袁廓足矣齊國建方出仕
稍至殿中郎王儉柳世隆傾心待之為太子洗馬于時
何憫亦稱才子為文惠太子作楊畔歌辭甚惻麗太子
甚悅廓之諫之曰夫楊畔既非典雅而聲甚哀思殿下
當降意簫韶奈何聽亡國之音太子改容謝之

劉祥字顯徵東莞莒人也曾祖穆之宋佐命元勲贈侍
中司徒自有傳祖式之宣城淮南二郡太守俱有傳父
數太宰從事中郎祥宋世解褐為巴陵王征西行軍參

軍少好文學性韻剛疎輕言肆行不避高下建元中為正貲郎司徒褚淵入朝以腰扇鄣日祥從側過曰作如是舉止羞面見人扇鄣何益淵曰寒士不遜祥曰不能殺袁劉安得免寒士永明初撰宋書譏斥禪代尚書令王儉密以啓聞武帝銜而不問歷臨川王驃騎從事中郎祥兄整為廣州卒官祥就整妻求還資事聞朝廷祥於朝士多所貶忽王奐為僕射祥與奐子融同載行至中堂見路人驅驢祥曰驢汝好為之如汝人才皆已為

令僕矣其侮慢如此著連珠十五首以寄其懷其譏議者云希世之寶遠時必賤偉俗之器無聖則淪是以明玉黜於楚岫章甫窮於越人有以祥連珠啓武帝帝令御史中丞任遐奏其過惡付廷尉上別遣勅祥曰卿素無行檢朝野所悉輕棄骨肉侮蔑兄嫂此是卿家行不足乃無關他人見卿擬連珠寄意悖慢彌不可長當原卿性命令卿萬里思愆卿若能改革當令卿得還乃徙廣州不得意終日縱酒少時病卒

陸澄字彥深吳郡吳人也祖劭臨海太守父瑗州從事澄少好學博覽無所不知行坐眠食手不釋卷起家太學博士宋太始初為尚書殿中郎議皇后諱班下應依舊稱姓左丞徐爰案司馬孚議皇后春秋逆王后于齊並不言姓澄以意立議坐免官白衣領職郎官舊坐杖有名無實澄在官積前後罰凡至千數後兼左丞泰始六年詔皇太子朝服袞冕九章澄與儀曹郎邱仲起議服冕以朝寶著經文秦除六冕漢明還備魏晉以來不

欲令臣下服衮冕故位公者加侍官今皇太子禮絕羣
后宜遵聖王盛典革近代之制累遷御史中丞建元元
年驃騎諮議沈憲等家奴客為劫子弟被劾憲等晏然
左丞任遐奏澄不糾請免澄官上表自理言舊例無左
丞糾中丞之儀詔外詳議尚書令褚淵檢宋以來左丞
糾正而中丞不糾免官者甚衆奏澄諛聞庸見貽撓後
昆上掩皇明下籠朝議請以見事免所居官詔澄以白
衣領職永明元年累遷度支尚書尋領國子博士尚書

令王儉謂之曰昔曹志繆悅為此官以君繼之始無慙
德儉嘗問澄曰崇禮門有鼓而未嘗鳴其事安在答曰
江左草創崇禮闈皆是茅茨故設鼓有火則扣以集衆
相傳至今又與王儉書陳王弼注易元學之所宗今若
弘儒鄭注不可廢并言左氏杜學之長穀梁舊有麋信
近益以范甯不足兩立世有一孝經題為鄭元注觀其
用辭不與注書相類案元自序所注衆書亦無孝經且
為小學之類不宜列在帝典儉答曰易體微遠實貫羣

籍豈可專據小王便為該備依舊存鄭高尚來說元凱
注傳超邁前儒穀梁小書無俟兩注存麋畧范率由舊
式凡此諸議並同雅論疑孝經非鄭所注僕以此書明
百行之首實人倫所先七畧藝文並陳之六藝不與蒼
頡凡將之流也鄭注虛實前代不嫌意謂可安仍舊立
置儉自以博聞多識讀書過澄澄謂曰僕少來無事唯
以讀書為業且年位已高今君少便鞅掌王務雖復一
覽便諳然見卷軸未必多僕儉集學士何憲等盛自商

畧澄待儉語畢然後談所遺漏數百十條皆儉所未覩
儉乃歎服儉在尚書省出巾箱几案雜服飾令學士隸
事事多者與之人人各得一兩物澄後來更出諸人所
不知事復各數條并舊物奪將去轉散騎常侍祕書監
吳郡中正光祿大夫加給事中尋領國子祭酒竟陵王
子良得古器小口方腹而底平可容七八升以問澄澄
曰此名服匿單于以與蘇武子良後詳視器底有字髣
髴可識如澄所說隆昌元年以老疾轉光祿大夫加散

騎常侍未拜卒謚靜子年七十澄當世稱為碩學讀易
三年不解文義欲撰宋書竟不成王儉戲之曰陸公書
厨也家多墳籍人所罕見撰地理書及雜傳死後乃出
初澄弟鮮得罪宋世當死澄於路見舍人王道隆叩頭
流血以此見原揚州主簿顧測以兩奴就鮮質錢鮮死
子暉誣為買券澄為中丞測遂為澄所抑世以此少之
王謏字仲和東海郟人晉少傅雅元孫也祖慶負外常
侍父元閔護軍司馬宋大明中沈曇慶為徐州辟謏為

迎主簿又為州迎從事湘東王或國常侍鎮北行參軍
及或即帝位是為明帝除司徒參軍帶薛令兼中書舍
人諶有學義甚見親遇常在左右帝所行慘僻諶屢諫
不從請退坐此繫尚方後拜中書侍郎明帝好園碁置
園碁州邑以建安王休仁為園碁州都大中正諶與太
子右率沈勃尚書水部郎庾珪之彭城丞王抗四人為
小中正朝請褚思莊傳楚之為清定訪問後為尚書左
丞領東觀祭酒即明帝所置總明觀也遷黃門郎永明

初累遷豫章王太尉司馬武帝與謏相遇於宋明之世甚委任之歷黃門郎領驍騎將軍太子中庶子謏貞正和謹朝廷稱為善人多與之厚八年轉冠軍將軍長沙王車騎長史徙廬江王中軍長史又徙西陽王子明征虜長史行南兖府州事謏少貧常自紡績及通貴後每為人說之世稱其達九年卒謏從叔摛以博學見知尚書令王儉嘗集才學之士總校虛實類物隸之謂之隸事自此始也儉嘗使賓客隸事多者賞之事皆窮唯廬

江何憲為勝乃賞以五花簾白團扇坐簾執扇容氣甚自得搗後至儉以所隸示之曰卿能奪之乎搗操筆便成文章既與辭亦華美舉坐擊掌搗乃命左右抽憲簾手自掣取扇登車而去儉笑曰所謂大力者負之而趨竟陵王子良校試諸學士唯搗問無不對為秣陵令清直請謁不行羽林隊主潘敞有寵勢傾人主婦弟犯法敞為之請搗搗投書於地更鞭四十敞怒譖之明日而見代永明八年天忽黃色照地衆莫能解司徒法曹王

融上金天頌摛曰是非金天所謂榮光武帝太悅用為
永陽郡後卒於尚書左丞時有何憲者字子思廬江灊
人博涉該通畢覽羣籍天閣寶祕人間散逸無遺漏焉
任昉劉渢共執祕閣四部書試問其所知自甲至丁書
說一事并敘述作之體連日累夜莫見所遺宗人何遁
退讓士也見而美之願與為友憲位本州別駕國子博
士永明十年使于魏時又有孔暹者字世逸會稽山陰
人也好典故學與王儉至交昇明中為齊臺尚書儀曹

郎屢箴闕禮多見信納上謂王儉曰孔邊真所謂儀曹不忝厥職也儉為宰相邊常謀議帷幄每及選用頗失鄉曲情儉從容啓上曰臣有孔邊猶陛下之有臣也永明中為太子家令卒時人呼孔邊何憲為王儉三公及卒儉惜之為撰祭文

劉瓛字子珪沛郡相人晉丹陽尹琰六世孫也祖弘之給事中父惠臨賀太守瓛篤志好學博通訓義年五歲聞舅孔熙先讀管寧傳欣然欲讀舅更為說之精意聽

受曰此可及也宋大明四年舉秀才兄璩亦有名先應
州舉至是別駕東海王元曾與璩父惠書曰此歲賢子
充秀州閭可謂得人除奉朝請不就兄弟三人共處蓬
室一間為風所倒無以葺之怡然自樂習業不廢聚徒
教授常有數十丹陽尹袁粲於後堂夜集聞而請之指
聽事前古柳樹謂璩曰人謂此是劉尹時樹每想高風
今復見卿清德可謂不衰矣薦為祕書郎不見用後拜
安成王撫軍行參軍以公事免璩素無宦情自此不復

仕袁粲誅璣微服往哭并致賻助高帝踐阼召璣入華林園談論問以政道答曰政在孝經宋氏所以亡陛下所以得之是也帝咨嗟曰儒者之言可寶萬世又謂璣曰吾應天革命物議以為何如璣對曰陛下誠前軌之失加之以寬厚雖危可安若循其覆轍雖安必危矣及出帝顧謂司徒褚淵曰方直乃爾學士故自過人勅璣使數入而璣自非詔見未常到宮門上欲用璣為中書郎使吏部尚書何戢喻旨戢謂璣曰上意欲以鳳池相

處恨君資輕可且就前除少日當轉國子博士便即所授璫曰平生無榮進意今聞得中書郎而拜記室豈本心哉後以母老闢養重拜彭城郡丞司徒褚淵宣旨喻之答曰自省無廊廟才所願唯保彭城丞耳上又以璫兼總明觀祭酒除豫章王驃騎記室參軍丞如故璫終不就武陵王曄為會稽太守上欲令璫為曄講除會稽郡丞學徒從之者轉衆永明初竟陵王子良請為征北司徒記室璫與張融王思遠書言情固辭不受除步兵

校尉又不拜璫姿狀纖小儒學冠於當時都下士子貴
遊莫不下席受業當時推其大儒以比古之曹鄭璫謙
率通美不以高名自居遊詣故人唯一門生持胡牀隨
後主人未通便坐門待答住在檀橋瓦屋數間皆上穿
漏學徒景慕不敢指斥呼為青溪馬竟陵王子良親往
修謁十年表武帝為璫立館以楊烈橋故主第給之生
徒皆賀璫曰室美豈為人哉此華宇豈吾宅邪幸可詔
作講堂猶恐見害也未及徙居遇疾子良遣從璫學者

彭城劉繪順陽范鎮將尉於璫宅營齋及卒門人受學並弔服臨送時年六十六璫有至性祖母病疽經年手持膏藥糊指為爛母孔氏甚嚴明嘗謂親戚曰阿稱便是今世曾子阿稱璫小名也年四十餘未有婚對建元中高帝與司徒褚淵為璫娶王氏女王氏因穿壁掛履土落孔氏牀上孔氏不悅璫怒即出其妻及居母憂不出廬足為之屈杖不能起此山常有鴝鵒鳥璫在山三年不敢來服釋還家此鳥乃至梁武帝少時嘗經伏膺

及天監元年下詔為璣立碑謚曰貞簡先生所著文集
行於世初璣講月令畢謂學生嚴桓之曰江右以來陰
陽歷數之學廢矣吾今講此曾不得其彷彿學者美其
退讓時濟陽蔡仲熊禮學博聞謂人曰五音本在中土
故氣韻調平今既東南土氣偏訛故不能感動木石璣
亦以為然仲熊執經議論往往與時宰不合亦終不改
操求同故坎壈不進歷年方至尚書左丞當時恨其不
遇又東陽婁幼瑜字季玉著禮据拾三十卷璣弟璣字

子敬方軌正直儒雅不及璫而文采過之宋泰豫中為
明帝挽郎建元初為武陵王曄冠軍征虜參軍曄與僚
佐飲自割鵝炙璫曰應刃落俎是宰夫之事殿下親執
鸞刀下官未敢安席因起請退與友人會稽孔暉同舟
入東於塘上遇一女子暉目送曰美而豔璫曰斯豈君
子所宜言乎非吾友也於是解裳自隔或曰與友孔徹
同舟入東徹留目觀岸上女子璫舉席自隔不復同坐
兄璫夜隔壁呼璫共語不答方下牀着衣立然後應璫

怪其久璉曰向來束帶未竟其立操如此文惠太子召璉入侍東宮每上事輒削草尋署射聲校尉卒於官時濟陽江重欣亦清介雖處閭室如對嚴賓而不及璉也重欣位至射聲校尉

陸慧曉字叔明吳郡吳人晉太尉玩之元孫也自玩至慧曉祖萬載世為侍中皆有名行伯父仲元又為侍中時人方之金張二族父子真仕宋為海陵太守時中書舍人狄當見幸家在海陵假還葬父子真不與相聞當

請發人脩橋又以妨農不許彭城王義康聞而賞之王
僧達貴公子孫以才傲物為吳郡太守入昌門曰彼有
人焉顧琛一公兩掾英英門戶陸子真五世內侍我之
流亞子真自臨海太守眼疾歸為中散大夫卒慧曉清
介正立不雜交遊會稽內史同郡張緒稱之曰江東裴
樂也初應州郡辟舉秀才歷諸府行參軍以母老還家
侍養十餘年不仕高帝輔政除為尚書殿中郎隣族來
相賀慧曉舉酒曰陸慧曉年踰三十婦父領選始作尚

書郎卿輩乃復以為慶邪高帝表禁奢侈慧曉撰答詔
草為帝所賞引為太傅東閣祭酒建元初仍遷太子洗
馬廬江何點常稱慧曉心如照鏡遇形觸物無不朗然
王思遠常如懷冰暑月亦有霜氣當時以為寶錄慧曉
與張融並宅其間有池池上有二株楊柳何點歎曰此
水便是醴泉此木便是交讓及武陵王暉出守會稽上
為精選僚吏以慧曉為征虜功曹與府參軍沛國劉璡
同從述職璡清介士也行至吳璡謂人曰吾聞張融與

陸慧曉並宅其間有水必有異味遂命駕往酌而飲之
曰飲此水則鄙吝之萌盡矣何點薦慧曉於豫章王徽
補司空掾加以恩禮累遷安西諮議領冠軍錄事參軍
武帝第三子廬陵王子卿為南豫州刺史帝稱其小名
謂司徒竟陵王子良曰烏熊癡如熊不得天下第一人
為行事無以壓一州既而曰吾思得人矣乃使慧曉為
長史行事臨別帝問曰卿何以輔持廬陵答曰靜以脩
身儉以養性靜則人不擾儉則人不煩上大悅後為司

徙右長史時陳郡謝朓為左長史府公竟陵王子良謂
王融曰我府二上佐求之前代誰比融曰明公二上佐
天下英奇少見其比子良西邸抄書令慧曉參知其事
尋遷西陽王征虜巴陵王後軍臨汝公輔國三府長史
行府州事復為西陽王左軍長史領會稽郡丞行郡事
隆昌元年徙為晉熙王冠軍長史江夏內史行郢州事
慧曉歷輔五政治身清肅僚佐以下造詣必起送之或
謂慧曉曰長史貴重不宜妄自謙屈答曰我性惡人無

禮不容不以禮處人未嘗卿士大夫或問其故慧曉曰
貴人不可卿而賤者乃可卿人生何容立輕重於懷抱
終身常呼人位建武初除西中郎長史行事內史如故
俄徵黃門郎未拜遷吏部郎尚書令王晏選門生補內
外要局慧曉為用數人而止晏恨之送女伎一人欲與
申好慧曉不納吏曹都令史歷政以來諮執選事慧曉
任已獨行未嘗與語帝遣主書單景儁以事詣問慧曉
仍謂曰都令史諳悉舊貫可共參懷慧曉謂景儁曰六

十之年不能復諮都令史為吏部郎也上若謂身不堪
便當拂衣而退帝甚憚之後欲用為侍中以形短小乃
止出為晉安王鎮北司馬征北長史東海太守行府州
事入為五兵尚書行揚州事崔慧景事平領右軍將軍
出監南徐州朝議復欲以為侍中王亮曰濟河須人今
且就朝廷借之以鎮南兗州王瑩王志皆曰侍中彌須
英華方鎮猶應有選者亮曰角其二者則貂璫緩拒寇
切當今朝廷甚弱宜從其切者乃以為輔國將軍南兗

州刺史加都督至鎮俄爾以疾卒贈太常三子僚佐倅
並有聲時人謂之三陸初授慧曉兗州三子依次第作
一讓表辭並雅麗時人歎伏僚學涉子史長於微言美
姿容鬚眉如畫位西昌侯長史蜀郡太守倅梁史有傳
慧曉兄子閑字遐業有風概與人交不苟合少為同郡
張緒所知仕至揚州別駕明帝崩閑謂所親人曰宮車
晏駕百司將聽冢宰主上地重才弱必不能振難將至
矣乃感心疾不復預州事永元末刺史始安王遙光據

東府作亂或勸去之閑曰吾為人吏何可逃死臺軍攻陷城閑以綱佐被收至杜姥宅尚書令徐孝嗣啓閑不預逆謀未及報徐世標命殺之閑四子厥絳完襄絳字魏卿時隨閑抱頸求代死不遂以身蔽刀刃行刑者俱害之厥字韓卿少有風綦雅好屬文永明元年詔百官舉士同郡司徒左西曹掾顧暉之表薦厥州舉秀才時盛為文章吳興沈約陳郡謝朓琅邪王融以氣類相推轂汝南周顒善識聲韻約等文皆用宮商將平上去入

四聲以此制韻有平頭上尾螽腰鶴膝五字之中音韻
悉異兩句之內角徵不同不可增減世呼為永明體沈
約宋書謝靈運傳後又論其事厥與約書曰范詹事自
序性別宮商識清濁特能適輕重濟艱難古今文人多
不全了斯處縱有會此者不必從根本中來尚書亦云
自靈均以來此秘未覩或問與理合匪由思至張蔡曹
王曾無先覺潘陸顏謝去之彌遠大旨與宮羽相變低
昂舛節若前有浮聲則後須切響一簡之內音韻盡殊

兩句之中輕重悉異辭既美矣理又善焉但觀歷代衆賢似不都諳此處而云此祕未覩近於誣乎案范云不從根本中来尚書云匪由思至斯則揣情謬於元黃摘句著其音律也范又云時有會此者尚書云或闇與理合則美韻清謳有辭章韻調者雖有差謬亦有會合推此以往可得而言夫思有合離前哲同所不免文有開塞即事不得無之子建所以好人譏彈士衡所以遺恨終篇既曰遺恨非盡美之作理可詆訶君子執其詆訶

便謂合理為闇豈如指其合理而寄詆訶為遺恨邪自
魏文屬論深以清濁為言劉楨奏書大明體勢之致齟
齬妥帖之談操末續巔之說興元黃於律呂比五色之
相宣苟此祕未覩茲論為何所指邪愚謂前英已早識
宮徵但未屈曲指的若今論所申至於掩瑕藏疾合少
謬多則臨淄所云人之著述不能無病者也非知之而
不改謂不改則不知斯曹陸又稱竭情多悔不可力彊
者也今許以有病有悔為言則必自知無悔無病之地

引其不了不合為闇何獨誣其一合一了之地乎意者亦質文時異今古好殊將急在情物而緩於章句情物文之所急美惡猶且相半章句意之所緩故合少而謬多義兼於斯必非不知明矣長門上林殆非一家之賦洛神池鴈便是二體之作孟堅精正詠史無虧於東主平子恢富羽獵不累於憑虛王粲初征他文未能稱是楊脩敏捷暑賦彌日不獻率意寡尤則事促乎一日醫翳愈伏而理賒於七步一人之思遲速天懸一家之文

工拙壤隔何獨宮商律呂必責其如一邪論者乃可言
未窮其致不得言曾無先覺也約答曰宮商之聲有五
文字之別累萬以累萬之繁配五聲之約高下低昂非
思力所學又非止若思而已十字之文顛倒相配字不
過十巧歷已不能盡何況復過於此者乎靈均以來未
經用之於懷抱固無從得其髣髴矣若斯之妙而聖人
不尚何邪此蓋曲折聲韻之巧無當於訓義非聖哲元
言之所急也是以子雲譬之雕蟲篆刺云壯夫不為自

古辭人豈不知宮羽之殊商徵之別雖知五音之異而
其才參差變動所昧實多故鄙意所謂此祕未覩者也
以此而推則知前世文士便未悟此處若以文章之音
韻同弦管之聲曲美惡妍蚩不得損相乖反譬猶子野
操曲安得忽有闌緩失調之聲以洛神比陳思他賦有
似異手之作故知天機啓則律呂自調六情滯則音律
頓舛也士衡雖云煥若縹錦寧有濯色江波其中復有
一片是衛文之服此則陸生之言即復不盡者矣韻與

不韻復有精麤輪扁不能言之老夫亦不辯盡此約論
四聲妙有銓辯而諸賦亦往往與聲韻乖時有王斌者
不知何許人著四聲論行於時斌初為道人博涉經籍
雅有才辯善屬文能唱導而不脩容儀嘗弊衣於瓦官
寺聽雲法師講成實論無復坐處唯僧正慧超尚空席
斌直坐其側慧超不能平乃罵曰那得此道人祿軟似
隊父唐突人因命驅之斌笑曰既有叙勲僧正何為無
隊父道人不為之動而撫機問難辭理清舉四坐皆屬

目後還俗以詩樂自樂人莫能名之永元元年始安王
遙光事難厥父閑被誅厥坐繫尚方尋有赦厥感慟而
卒年二十八文集行於世時又有會稽虞炎以文學與
沈約俱為文惠太子所遇意眖殊常官至驍騎將軍厥
弟襄附載倕傳

孔稚珪字德璋會稽山陰人也祖道隆位侍中父靈產
泰始中罷晉安太守有隱遁之志於禹井山立館事道
精篤吉日於靜屋四面朝拜涕泗滂沲東出過錢塘北

郭輒於舟中遥拜杜子恭墓自此至都東向坐不敢背
側元徽中為中散大夫頗解天文好術數高帝輔政沈
攸之起兵靈產密白高帝曰沈攸之兵衆雖彊以天時
冥數而觀無能為也高帝驗其言擢遷光祿大夫以簾
盛靈產上靈臺令其占候餉靈產白羽扇素隱几曰君
有古人之風故遺君古人之服當世榮之稚珪少學涉
有美譽太守王僧虔見而重之引為主簿州舉秀才再
遷殿中郎高帝為驃騎以稚珪有文翰取為記室參軍

與江淹對掌辭筆為尚書左丞父憂去官與兄仲智還居父山舍仲智妾李氏驕妬無禮稚珪白太守王敬則殺之永明中歷位黃門郎太子中庶子廷尉江左相承用晉世張裴杜預注律二十卷曰張杜律武帝留心法令數訊囚徒詔獄官詳正舊注先是尚書刪定郎王植撰定律奏之削其煩害錄其允衷取張裴注七百三十一條杜預注七百九十一條或二家兩釋於義乃備者又取一百十條其注相同者取一百三條集為一書凡

一千五百三十二條為二十卷請付外詳校摘其違繆
詔從之於是公卿八座參議考正舊注有輕重處竟陵
王子良下意多使從輕其中朝議不能斷者則制旨平
決至九年成書稚珪表上律文二十卷錄序一卷所奏
獲允者宜寫律上國學置律助教依五經例國子有欲
讀者策試上過第即擢用使處法職以勸士流詔報從
之事竟不行轉御史中丞建武初為平西長史南郡太
守稚珪以魏連歲南伐百姓死傷乃上表陳通和之策

帝不從徵侍中不行留本任稚珪風韻清疎好文詠飲
酒七八斗與外兄張融情趣相得又與琅邪王思遠廬
江何點點弟兄並款交不樂世務居宅盛營山水憑几
獨酌傍無雜事門庭之內草萊不翦中有蛙鳴或問之
曰欲為陳蕃乎稚珪笑答曰我以此當兩部鼓吹何必
效蕃王晏嘗鳴鼓吹候之間羣蛙鳴曰此殊聒人耳稚
珪曰我聽鼓吹殆不及此晏甚有慙色永元元年為都
官尚書遷太子詹事加騎常侍三年稚珪疾東昏屏除

以牀舁之走因此疾甚遂卒贈金紫光祿大夫

周顥字彥倫汝南安成人晉左光祿大夫顥七世孫也
祖虎頭員外常侍父恂歸鄉相顥少為族祖朗所知解
褐海陵國侍郎益州刺史蕭惠開賞異顥携入蜀為厲
鋒將軍帶肥鄉成都二縣令仍為府主簿嘗謂惠開性
太險每致諫惠開不悅答顥曰天險地險王侯設險但
問用險何如耳隨惠開還都宋明帝頗好元理以顥有
辭義引入殿內親近宿直帝所為慘毒之事顥不敢顯

諫輒誦經中因緣罪福事帝亦為之小止元徽中詔為
郟令有恩惠百姓思之高帝輔政引接顓顓善尺牘沈
攸之送絕交書高帝口授令顓裁答轉齊臺殿中郎建
元初為長沙王後軍參軍山陰令還為文惠太子中軍
錄事參軍文惠在東宮顓遷正貲郎始興王前軍諮議
直侍殿省深見賞遇顓音辭辯麗出言不窮宮商朱紫
發口成句汎涉百家長於佛理著三宗論言空假義西
涼州智林道人遺顓書深相贊美言捉麈尾來四十餘

載頗見宗錄唯此塗白黑無一人得者為之發病非意
此音猥來入耳其論見重如此顯於鍾山西立隱舍休
沐則歸之轉太子僕射兼著作撰起居注遷中書郎兼
著作常游侍東宮少從外氏車騎將軍臧質家得衛恒
散隸書法學之甚工文惠太子使顯書元圃茅齋壁國
子祭酒何允以倒薤書來就顯換之顯笑而答曰天下
有道邱不與易也每賓友會問顯虛席晤語辭韻如流
聽號者忘倦兼善老易與張融相遇輒以元言相滯彌

日不解清貧寡欲終日長蔬雖有妻子獨處山舍衛將軍王儉謂顥曰卿山中何所食顥曰赤米白鹽綠葵紫蓼文惠太子問顥菜食何味最勝顥曰春初早韭秋末晚菘時何允亦精言佛法無妻妾太子又問顥卿精進何如何允顥曰三塗八難共所未免然各有其累太子曰所累伊何對曰周妻何肉其言辭應變皆如此也轉國子博士兼著作郎如故太學諸生慕其風爭事華辯始著四聲切韻行於世後卒於官子捨列在陳史

庾杲之字景行新野人也祖深之位義興太守雍州刺史以善政聞父粲為宋南郡王義宣丞相城局參軍王舉兵見殺杲之幼有孝行宋司空劉劭見而奇之謂曰見卿足使江漢崇望杞梓發聲解褐奉朝請稍遷駕部郎清貧自業食唯有韭蘆瀹韭生韭雜菜任昉戲之曰誰謂庾郎貧食鮭常有二十七種言三九也累遷尚書左丞衛軍王儉謂人曰昔袁公作衛軍欲用我為長史雖不獲就要是意向如此今應須如我輩人也乃用杲

之為衛軍長史安陸侯蕭緬與儉書曰盛時元僚寶難
其選庾景行汎綠水依芙蓉何其麗也時人以入儉府
為蓮花池故緬書美之歷位黃門吏部郎御史中丞參
掌大選杲之風範和潤善音吐武帝令對魏使兼侍中
上每歎其風姿之美柳世隆在御座謂武帝曰庾杲之
為蟬冕所映彌有華采陛下故當與其即真上甚悅王
儉乃曰國家以杲之清美所以許其假職若以其即真
當在胡諧之後武帝嘗與朝臣畧酒後謂羣臣曰我

後當得何謚羣臣莫有答者王儉因目杲之杲之從容
曰陛下壽等南山方與日月齊明千載之後豈是臣子
輕所仰量時人雅歎其辯答杲之嘗兼主客郎對魏使
使問杲之曰百姓那得家家題門帖賣宅答曰朝廷既
欲掃蕩京洛尅復神州所以家家賣宅耳魏使縮鼻而
不答時諸王年少不得妄稱接人勅杲之及濟陽江淹
五曰一詣諸王使申遊好再遷吏部郎參大選事太子
右衛率加通直常侍九年卒上甚惜之謚曰貞子

江敷字叔文濟陽考城人也曾祖夷宋湘州刺史自有傳祖湛吏部尚書父任著作佐郎敷母宋文帝女淮陽長公主幼以戚屬召見孝武謂謝莊曰此小兒方當為名器少有美譽尚孝武女臨汝公主拜駙馬都尉為丹陽丞時袁粲為尹見敷歎曰風流不墜政在江郎敷與宴賞留連日夜遷中書郎敷庶祖母王氏老疾敷視膳嘗藥七十餘日不解衣及累居內官每以侍奉陳請朝廷優其朝直初湛娶褚秀之女大義不終褚淵為衛軍

重敷為人先通意引為長史隨府轉司空長史領臨淮
太守轉高帝太尉從事中郎齊臺建為吏部郎高帝即
位敷以祖母久疾連年臺閣之職永廢溫清啓求自解
初宋明帝勅敷出繼其叔孫為從祖淳後於是僕射王
儉啓禮無後小宗之文近世緣情皆由父祖之命未有
既孤之後出繼宗族也雖復臣子一揆而義非天屬江
忠簡允嗣所寄唯敷一人傍無葦屬敷宜還奉若不欲
江孫絕後可以敷小兒繼孫為孫尚書參議以間世立

後禮無其文荀顗無子立孫墜禮之始何琦又立此論
義無所據於是數還本家詔使自量立後者出為豫章
內史還除太子中庶子未拜門客通賊利武帝遣使檢
覆數藏此客而躬自引咎上甚有怪色王儉從容啓上
曰江數若能臨郡此便是具美耳上意乃釋永明中為
竟陵王司馬數好文辭園基第五品為朝貴中最選侍
中歷五兵尚書東陽吳二郡太守復為侍中尋轉都官
尚書領驍騎將軍王晏啓武帝曰江數今重登禮閣兼

掌六軍慈渥所覃實有優忝但語其事任殆同閑輦天
旨既欲升其名位愚謂以侍中領驍騎望實清顯有殊
納言上曰數常啓吾為其鼻中惡今既以何允王瑩還
門下故有此面換耳先是中書舍人紀僧真得幸於武
帝稍歷軍校容表有士風謂帝曰臣小人出自本縣武
吏邀逢聖時階榮至此為兒婚得荀昭光女即時無復
所須唯就陛下乞作士大夫帝曰由江數謝瀹我不得
厝此意可自詣之僧真承旨詣數登榻坐定數便命左

右曰移吾牀讓客僧真喪氣而退告武帝曰士大夫故
非天子所命時人重數風格不為權倖降意隆昌元年
為侍中領國子祭酒鬱林廢朝臣皆被召入宮數至雲
龍門方知廢立託散動醉吐車中而去明帝即位改領
祕書監又改領晉安王師卒年四十四遺令不受賻贈
詔賻錢三萬布百疋子禧啓遵數命不受詔嘉美之從
其所請贈散騎常侍太常卿謚曰敬子子禧列在梁史
何戢字惠景廬江灊人也祖尚之宋中書令自有傳父

偃吏部尚書被遇於孝武帝戢以選尚山陰公主拜駙
馬都尉累遷中書郎景和世山陰主就帝求吏部郎褚
淵入內侍已淵雖見拘迫終不肯從與戢同居止月餘
由是特申情好元徽初淵參朝政引戢為侍中時年二
十九戢以年未三十苦辭內侍改授司徒左長史高帝
為領軍與戢來往數申歡宴上好水引麤戢令婦女躬
自執事以設上焉久之復為侍中累遷高帝相國長史
建元元年遷散騎常侍太子詹事尋改侍中詹事如故

上欲轉戢領選問尚書令褚淵以戢資重欲加散騎常侍淵曰宋世王球從侍中中書令單作吏部尚書資與戢相似領選職方昔少輕不容頓加常侍聖旨每以蟬冕不宜過多臣與王儉既已左珥若復加戢則八座便有三蟬若帖以驍騎亦不為少乃以戢為吏部尚書加驍騎將軍戢美容儀動止與褚淵相慕時人呼為小褚公家業富盛性又華侈衣被服飾極為奢麗出為左衛將軍吳興太守上頗好畫扇宋孝武曾賜戢蟬雀扇乃

顧景秀所畫時吳郡陸探微顧彥先皆能畫歎其巧絕
戢因王晏獻之上令晏厚酬其意明年卒時年三十六
謚懿子女為鬱林王后以后父追贈侍中右光祿大夫
戢從叔昌寓字儼望父終之位侍中昌寓少而清靖獨
立不羣所交者必當世清名是以風流籍甚仕宋為尚
書儀曹郎建平王景素征北南徐州府主簿以風素見
重母老求祿出為湘東太守還為高帝驃騎功曹昌寓
在郡景素被誅昌寓痛之至是啓高帝理其冤又與司

空褚淵書極言之高帝嘉其義歷位中書郎王儉衛軍長史儉謂昌寓曰後任朝事者非卿而誰臨海王昭秀為荊州以昌寓為西中郎長史南郡太守行荊州事明帝將踐阼先使裴叔業齎旨詔昌寓令以便宜從事昌寓拒之曰國家委身以上流之重付身以萬里之事臨海王未有失寧得從君單詔邪即時自有啓聞須臾更議叔業曰若爾便是拒詔拒詔軍法行事耳答曰能見殺者君也能拒詔者僕也君不能見殺政有沿流之計

耳昌寓素有名德叔業不敢逼而退上聞而嘉之昭秀
由此得還都昌寓後為吏部尚書嘗有一客姓閔求官
昌寓謂曰君是誰後答曰子騫後昌寓以團扇掩口而
笑謂坐客曰遥遥華胄昌寓不雜交游通和汎愛歷郡
皆以清白稱後卒於侍中領驍騎將軍贈太常謚曰簡
子子敬容後史有傳

蔡約字景撫濟陽考城人也祖廓宋祠部尚書自有傳
父興宗光祿大夫約少尚宋孝武帝女安吉公主拜駙

馬都尉仕齊累遷太子中庶子領屯騎校尉永明八年八月合朔約既武冠解劒於省眠至下鼓不起為有司所奏贖論出為宜都王冠軍長史淮南太守行府州事武帝謂曰今用卿為近藩上佐想副我所期約曰南豫密邇京師不化自理臣亦何人爝火不息時諸王行事多相裁割約居右任主佐之間穆如也遷司徒左長史明帝為錄尚書輔政百僚脫屐到席約躡屐不改帝謂江祐曰蔡氏是禮度之門故自可悅祐曰大將軍有損

客復見於今約好飲酒夷淡不與世雜永元二年卒於
太子詹事年四十四贈太常弟樽列在梁史

裴昭明河東聞喜人祖松之宋光祿大夫自有傳父駟
南中郎外兵參軍昭明少傳儒史之業宋泰始中為太
學博士有司奏太子婚納徵用玉璧虎皮未詳何所準
擬昭明議曰禮納徵儷皮鄭云皮為庭實鹿皮也晉太
子納妃注以虎皮二太元中公主納徵虎豹皮各一此
豈謂婚禮不詳王公之差故取虎豹文蔚以尊其事虎

豹雖文而徵禮所不言熊羆雖古而婚禮所不及珪璋雖美或為用各異今宜準經誥凡諸僻謬一皆詳正於是是有司參議加珪璋豹熊羆皮各二元徽中出為長沙郡丞罷任刺史王蘊之謂曰卿清貧必無還資湘中人士有須一禮之命者我不愛也昭明曰下官忝為郡佐不能光益上府豈以鴻都之事仰累清風歷祠部通直郎永明三年使魏武帝謂之曰以卿有將命之才使還當以一郡相賞還為始安內史郡人龔元宣云神人與

其玉印玉版書不須筆吹紙便成字自稱龔聖人以此惑衆前後郡太守敬事之昭明付獄案罪及還甚貧龔武帝曰裴昭明罷郡還遂無宅居我不讀書不知古人中誰可比之遷射聲校尉九年復北使建武初為王元邈安北長史廣陵太守明帝以其在事無啓奏代還責之昭明曰臣不欲競執關鍵故耳昭明歷郡皆清勤常謂人曰人生何事須聚畜一身之外亦復何須子孫若不才我聚彼散若能自立則不如一經故終身不治產

業中興二年卒子子野列在梁史

顧憲之字士思吳郡吳人宋湘州刺史覲之之孫也覲之自有傳憲之性清直宋元徽中為建康令時有盜牛者與本主爭牛各稱已物二家辭證等前後令莫能決憲之至覆其狀乃令解牛任其所去牛徑還本宅盜者始伏其罪時人號曰神明至於權要請託長史貪殘據法直繩無所阿縱性又清儉彊力為政甚得人和故都下飲酒者醇旨輒號為顧建康謂其清且美焉仕齊為

衡陽內史先是郡境連歲疾疫死者大半棺槨尤貴悉裹以蓆席棄之路傍憲之下教分告屬縣求其親黨悉令殯葬其家人絕滅者憲之出公祿使綱紀營護之又土俗山人有病輒云先亡為禍皆開冢剖棺水洗枯骨名為除崇憲之曉喻為陳死生之別事不相由風俗遂改時刺史王奐初至唯衡陽獨無訟者乃歎曰顧衡陽之化至矣若九郡率然吾將何事後為東中郎長史行會稽郡事山陰人呂文度有寵於武帝於餘姚立邸頗

縱橫憲之至郡即日除之文度後還冀郡縣爭赴弔憲之不與相聞文度甚銜之亦卒不能傷也時西陵戍主杜元懿以吳興歲儉會稽年登商旅往來倍於他歲西陵牛塋稅官格曰三千五百求加至一倍計年長百萬浦陽南北津及柳浦四塋乞為官領攝一年格外長四百許萬武帝以示會稽使陳得失憲之議曰尋始立牛塋非苟通僥以納稅也當以風濤迅險人力不捷立此濟急以利物耳既公私是樂故輸直無怨京師航渡即

其例也而後之監領各務已功或禁遏別道又生理外凡如此類不經埭煩牛者上詳被報蒙停格外十條從來喧訴始得暫弭案吳興頻歲失稔今茲尤饑去乏從豐良由飢餒舊格新減尚未議登格外加倍將以何術皇慈恤隱振廩蠲調而元懿幸災攘利重增困瘼人不仁古今共疾且此見加格置市者前後相屬非唯新加無贏並皆舊格有關愚恐元懿今啓亦當不殊若事不副言懼貽譴詰便百方侵苦為公賈怨為害不小又

言民間利病數事武帝並從之由是深以方直見知遷
南中郎巴陵王長史南兗南豫二州事典籤諸事未嘗
接以顏色動遵法制時司徒竟陵王於宣城臨成定陵
三縣界立屯封山澤數百里禁人樵採憲之固陳不可
言甚切直王曰非君無以聞此德音即命罷屯禁遽給
事黃門郎兼尚書吏部郎中宋時其祖覲之嘗為吏部
於庭列植嘉樹謂人曰吾為憲之植耳至是憲之果為
此職永明中為豫章內史在任清簡務存寬惠有貞婦

萬晞者少孀居無子事舅姑尤孝父母欲奪而嫁之誓死不許憲之賜以束帛表其節義梁武平建鄴為揚州牧徵憲之為別駕後事史比至而已受禪憲之風疾漸篤因求還吳就加太中大夫憲之雖累經宰郡資無儋石及歸蕭然環堵不免飢寒天監八年卒於家臨終為制勅其子薄葬務從簡素所著詩賦銘讚并衡陽郡記數十篇

孔琇之會稽山陰人宋侍中特進左光祿大夫靖之孫

也靖自有傳父靈運著作郎琇之幼為國子生舉孝廉補吳令有小兒年十歲偷刈鄰家稻一束琇之付獄案罪或諫之答曰十歲便能為盜長大何所不為縣中皆震肅遷尚書左丞又以職事知名後兼左戶尚書廷尉卿出為臨海太守在任清約罷郡獻乾薑二十斤武帝嫌其少及知琇之清乃歎息出監吳興郡尋拜太守政稱清嚴明帝輔政防備諸藩致密旨於上佐使便宜從事隆昌元年遷晉熙王冠軍長史江夏內史行郢州事

欲令殺晉熙琇之辭不許欲自引決友人陸閑諫之琇之不從遂不食而死子臻至太子舍人尚書三公郎臻子幼孫梁寧遠枝江公主簿無錫令幼孫子負負列在陳史

王逡之字宣約琅邪臨沂人晉尚書僕射彬元孫也曾祖彪之位尚書令祖臨之御史中丞父瓌之司空諮議參軍從兄准之宋丹陽尹贈太常逡之少好學博聞仕宋位吳令昇明末尚書左僕射王儉重儒術逡之以著

作郎兼尚書左丞參定齊國儀禮初儉檢撰古今喪服
集記遂之難儉十一條更撰世行五卷時國學久廢建
武先十年遂之先上表立學轉國子博士又兼著作郎永
明起居注後位南康相光祿大夫加給事中遂之率素
衣袞不幹几案塵黑年老手不釋卷建武二年卒從弟
珪之位長水校尉撰齊儀職永明九年其子中軍參軍
顯啓上其書凡五十卷詔付祕閣

通志卷一百三十八